



擷芳集卷之三十一目錄

才媛詩

古歙初菴汪啟淑選



袁寒篁 七首

吳山 二十首

王夢鸞 二首

王仙駕 二首

黃嘉 八首

倪宜 二首

朱氏 六首

楊珊珊 一首

鄒溶 四首

劉月卿 二首

張靜 九首

姚靜芬 二首

張英 三首

劉世坤 一首

汪瑤 一首

李美儀 三首

王氏 句

莫兆椿 七首

擷芳集卷之三十一

古歛訥菴汪啟淑選

袁寒篁

字青湘江蘇婁縣人袁玉屏之女也性孤潔有

孝行著有綠窻小草

塘南野乘寒篁袁氏為郡城文學袁玉屏女其
 先本王氏江州司馬孟明公之後袁乃繼姓也
 玉屏無子而早喪其偶寒篁守貞以待椿庭所
 著綠窻小草一時明公鉅卿咸推其才焦南浦
 先生遷居郡城時玉屏以其詩文就正且令拜
 唐太夫人為母而以兄事先生先生歸浦南寒
 篁嘗一再至先生教澤及
 乎閨門亦一時盛事也
 王鴻緒綠窻小草序嘗聞遇窮而詩工非窮能
 工詩窮能見性也蓋言之出於至性者其旨切

其詞哀而仍不失和平温厚之意所以讀者尋
 繹不倦然執此以論閨中之作則有難焉者夫
 自古迄今女才歷有璇璣一圖千載絕作而所
 寓無非憂愁憤懣咏絮佳句膾炙人口而大旨
 不過風流蘊藉此無論遇之窮與否以言乎情
 則有之而至性無關也茲閱綠牕稿感慨思深
 詞旨幽咽脫簪珥以待椿闈望停雲而思萱草
 純孝之哀淚花落處化作筆花至性所形文詞
 自佳非徒寓其憂思與寄其蘊藉始超古人而
 上之矣惟如是而後能處窮亦惟如是而始信
 詩工也昔人之
 言真不吾誣矣

王式丹題綠窻小草詩洗却尋常脂粉叢倚窻
 詩思落秋空海棠一曲何人聽自向金風玉露
 中一墮書圍欲等身牽蘿補屋處宵晨
 幽蘭標格原空谷莫比併紅儷紫人
 黃之雋贈袁寒篁東風第一枝詞研粉牋光簪
 花字楷綠窻詠慣飛絮嚮傳彩筆徵君最賞翠
 閨孝女水心蘭款為唐勒梅花題句便費却子
 建吟毫江上和填金縷 曾話向鳳池夜雨想

讀遍苧城春樹故鄉老去歸來待拾斷絀片羽
 采風名媛厭厭脂黛香奩陳語願手浣清露薔薇
 細寫謝
 庭新著

遠眺

簾捲倚高樓青山相對愁夕陽搖酒旆野渡繫漁舟樹
 密烟光亂江空水氣浮歛眉無限恨身世等悠悠

賦得風回雲斷雨初晴

厭絕風聲雜雨聲忽看雲散晚來晴歸帆路遠波光直
 濃樹烟開鳥語輕山翠有痕猶黛歛池荷餘滴尙珠傾
 不知何處漁村好掩映垂楊夕照橫

夜讀

夢裏凌虛詠少微
休言閨閣讀書非
貫淹今古知經世
徹悟淵源在靜機
斑管每隨妝鏡匣
牙籤常列繡屏幃
斯文豈爲登雲路
別有水心似月輝

月夜

一天風露月娟娟
兔影依稀桂影圓
此際青閨加皎潔
研羅衫子別清妍

自遣

療饑自有忘憂處
樂此衙門水一灣
謾訝家貧無四壁
家無四壁好看山

拾翠亭春晚

垂楊烟鎖畫橋西
荷葉如錢映碧溪
人立小亭花欲落
鶯聲漸老不勝啼

秋宵

梧桐落葉集棲鴉
茉莉開餘點翠華
試問碧空深夜月
笛聲吹去照誰家

吳山

字岩子安徽當塗縣人
適太平縣丞卞琳幼攻
筆墨嗜詩好古歸琳後
頻遭患難轉徙他鄉者
七年戊寅冬始卜居于
石城青溪間爲栖隱計
無何江東亂幾致覆巢
丁亥春乃攜詩囊書篋

附舟出關與徐夫人智珠登金焦遊虎阜後至
明聖湖縱覽孤山葛嶺之勝而詩篇日益富仁
和錢塘雨令君聞其名爲分俸以給之傳爲佳
話云著有青山集

魏禧青山集序青山集者卞君楚玉夫人吳岩
子氏所作也夫人家青山旣轉徙江淮無常地
有西湖梁谿虎邱廣陵諸集最後彙次之以青
山名夫人於是年六十餘矣楚玉中道卽世未
有後夫人依女夫劉子峻度以老時回首故鄉
躊躇躑躅不勝叩首之感焉天下女子能詩者
不乏人夫人于興亡盛衰之大故篇什留連不
一而足有國風諷刺小雅怨誹之義予讀之低
徊泣下然楚玉一貧書生夫人非有象服六珈
之遇而往往若此則眞吾所不解也夫人以詩
名垂四十年工書法晚更好道得奇疾疾作則
右手自運動日夜作字不休或濡筆書紙上悉

成元理疾止不復記憶凡二年而愈白髮朱顏
奕然有丹砂之色遂不甚作詩矣予交峻度長
善來廣陵輒主之夫人與其二女嘗以詩畫酬
贈予內子間屬予論定其詩因得請見夫人吐
辭温文出入經史相對如
士大夫予每退而歎息云

吳青山人爲卞楚玉配以詩名工書法晚更好
道得奇疾疾作則右手自運動日夜作字不休
或濡筆書紙上悉成元理疾止不復記憶凡二
年而愈白髮朱顏奕然有丹砂之色長女元文
工詩辭次女德基善畫並賢能好讀書精筆
札先後事劉孝廉竣度竣度以賢豪名廣陵
圖繪寶鑑吳山字岩子太平人縣丞卞琳室也
詩文甚富畫惟寫意山水書工草楷戊巳間曾
寓西湖諸名宿
俱與之唱和

西湖志吳山字岩子太平人居西湖上三年武
林名流多所推重
阮亭王士正觀吳巖子書扇詩紈扇凝香小字
斜似聞金椀寄秦嘉景陽宮畔文君井明聖湖

頭道韞家繡閣新詞名漱玉朱絲妙格字
 簪花烟波風雨錢塘路望斷西陵油壁車
 吳偉業送吳若子卜居湖上詩送春猶及柳絲
 風杜宇情多繞故宮草長六橋香欲去花飛三
 月夢初逢青溪煙雨知何代後庭玉樹紛難再
 啼鳥應改舊朱樓當年人影雙雙在萬事飄零
 豈自繇鴟羹一艇還網繆博山簾捲開芳咏無
 數江蘭正竝頭九天咳唾明珠墜玉鈎敲醒鸚
 哥醉閨閣文章事已奇江山畫家如寄千秋
 逸韵落晴湖廡下何須更傲吳為著風流高士
 傳敢題金
 粉麗人圖
 鄧漢儀題吳巖子青山集詩江湖薄梗亂離身
 破硯單衫相對貧今日一燈花雨外青山自署
 女遺民六朝春草盛詩名流寓偏深廡下情教
 得左家嬌女在東平今喜嫁劉生當時閨閣愛
 招邀曾倚朱欄聽暮潮可奈柳花零落盡白頭
 空憶段家橋繡佛簾帷懶自開六時清磬繞香
 臺紛紛女伴齊歌舞
 休遣鈿車十道催

新霽

新霽健草木林塘肆芬芳拂石竹陰晚地幽人亦涼遠
 天自空靜蟬風吹夕陽

法海寺

聞說隋家帝於此建宮闕種色玉鈎斜煬帝葬宮人處年年芳
 草發代往存形勝古刹依林樾輕風吹錦帆今昔一明

月

望鍾山

天氣清無霞遠山益幽靄凭樓縱觀眺目與羣物會清
 風自南來竹樹生微籟歌禽唱金縷翠篠飄羅帶時佳

景復麗賞心亦高邁延竚望鍾陵眷然悵松檜似覺古
今短徒謂乾坤大念昔爽鳩氏川原鮮常在

集不繫園

兩峯不出雲十里春陰譜水上快鳧鷗簾前怨鸚鵡花
寒不放香月瘦未見補莫謂近山晴遠煙還是雨

越城歌

越王城邊春鳥吟忽思美人歌舞心一朝歌舞向吳國
水犀軍散劍池深姑蘇臺下草連天鴟夷一艇何茫然

泊舟香口

薄暮到香口風迴卽泊舟一溪分竹進兩岸斷江流落

日明殘曠荒烟襲廢樓籬邊雞犬靜寥落使人愁

秦淮舟集同劉李諸夫人分韻

一棹輕隨岸柳斜晚霞落日集名家六朝風物秦淮水
三月春情穀雨茶隔樹嵐光青照眼護橋烟色白侵沙
萬重樓閣闌干遶處處籬邊著好花

中秋

最愛寒光好處圓今宵何事轉悽然兩宮昔日繁華地
百代清秋水月天鳧雁不關離黍恨湖山寧受後人憐
聊乘一葉中流放風露依稀咽管絃

幽居

獨尋香處結孤茅，泉石膏肓疾未消。
放鶴啟扉歌醉竹，通泉鑿石跨飛橋。
露香秋老收蓮種，花雨春深課藥苗。
食罷行吟循澤畔，櫂歌聲引夕陽潮。

徙倚

自傷蓬跡遠，常羨旅鴻歸。
昨得家人信，青山滿蕨薇。

題畫

雪意滿前山，蒼雲落寒樹。
扁舟人不歸，想在谿中住。

清明

而今何處覓桃源，風雨清明且閉門。
春草萋萋歸不得，江南多少未招魂。

姑蘇棹歌

水色連山青欲流，漁人終日掉輕舟。
一條古路分吳越，直到錢塘江岸頭。

水轉楓橋徑轉幽，人家綠樹映高樓。
木犀秋滿山塘上，一路清香到虎邱。

寒食憶逝

去年此日買蘭橈，薄暮輕陰轉石橋。
未到平山明月上，水香深處共聞簫。

三月清明風雨斜，江城花柳帶人家。
春花花落盡悲春去，尚有來春發舊花。

廣陵雜詠

選四有序

丁亥夏日橋寓廣陵園亭殘紅剩碧斷砌頽垣
觸景興思不無銅駝玉樹之感一簾垂永半榻
放懸七事付奴五言課女澹烟疎樹皆信手拈
來鳥語花香欲揮之不去念春光其未遠悵秋
色之欲來載嘆載歌情因感發辭鮮緣題
閒紀一時之槩耳雖云無補聊寫我聞

檢點遊裝問有無欲呼雙鹿駕柴車一椽傍水留新句
幾擔移家只舊書

一榻殘書兼旅思半窗燈火與疎鐘靜看六代江南志
坐盡維揚夜雨濃

新雨足時芳草綠野棠開處鶉鳩鳴只今曾閱人多少
感盡江山萬古情

悵望遙天羨鳥歸落雲深處暑光微荒階漸有蟲聲出
秋欲來時細雨飛

王夢鸞

字仙御浙江桐鄉縣人

姑蘇楊柳枝詞二首

家住橫塘春復秋門前楊柳數株柔畫欄長是周遭護
不遣行人繫紫騮

柳條風靜雨初收更罷羅衣嬾上樓花下欲將新月拜
一鈎恰到綠梢頭

王仙駕

夢鸞妹也

姑蘇楊柳枝詞二首

絲絲低冑石欄干擬向階前折取看臨舉玉織猶障袖
吹花風起覺添寒

交枝楊柳映重門樹色濛濛帶雨痕繡幙不開人欲倦
只疑深閣易黃昏

黃嘉

字季雅江蘇上元縣人

碎琴山人韓矩黃季雅詩序鳳凰臺上萬家簫
管行春燕子磯前六代江山入畫城圍建業甲
第連雲水繞秦淮鶯花作陣芳樂苑歌鐘已歇
尚遺苔逕之釵景陽樓羅綺雖空猶拾蓬根之

翠夢桓伊之弄笛韻入青冥擷江總之吟囊香
生錦肺玉樹後庭之曲聽來孫楚樓頭烏衣白
裕之羣行遍謝公墩下歌風肆雅競握隨珠習
禮敦詩咸持漢璧居斯地也乃有人焉四姓金
張之族交推壺內庾徐三吳顧陸之家盡說閨
中鮑謝甫離毀齒搗黛管以花飛乍即勝衣運
霜毫而錦爛薰香之暇便自研硃織素之餘偏
思弄墨而且清冰作骨無殊落雁之安妃白雪
為神不異凌波之江女猩紅染靨笑憐齟齒之
工鴉翠描髮蹙有蛾眉之倩舞三眠之楊柳居
然娟秀遙臨點半額之梅花正是壽陽乍卧何
年竊藥雕蟲原月殿之娥此日吹簫揮翰是秦
樓之子天平帝也空北部之胭脂人也仙歟壓
南朝之金粉蝦鬚帳啟唾落紅衫犀甲屏張雲
生紺袖左家嬌女竹間之蛺蝶頻來管氏夫人
匣裏之鴛鴦不去雲融綺旭撲柳絮以行吟香
暖瑤卮指椒花而作咏櫻桃初熟製雅什以新
妍菡萏方開譜新詞而麗則烟空樓榭鳥語千
聲柳暗簾櫳鶯啼百轉李易安工為雋語艷比
芙蓉謝道韞慣寫柔情芬同薈蔔敲簪擊鉢時

時繡都尉鴛鴦滴粉搓酥夜夜製邱遲翡翠如
入建章宮闕悉皆金鎖銀鋪似來衛尉園亭總
是珠輝玉媚賡謠未已披賞難忘嗟乎俗號詩
人畧諸競病世言名士粗曉之無黃初秦始以
前從未登其堂與武德貞觀以後何常涉彼藩
籬詎知巾幗名篇反勝鬚眉穢集繞架插珊瑚
之筆多畫簾微雨之詞盈箱積玳瑁之箋半綺
閣名霞之句苜蒲雅製字字流傳荳蔻新吟人
人繕寫國士而爲國色洵看冠冕詞壇美人原
是才人信可笙簧藝苑金陵花草從此生輝白
下河山因而增秀披雲漢天孫之錦桂
樹扶輪讀萬年公主之辭薔薇作蓋

小園

嫩日閒園爽空堦秀竹孫亂藤穿石罅老樹立雲根水
漾青浮榻山涵翠到門耽吟憐幼女待字未成婚

遣興

綠陰深院靜高咏倚庭梧水煖魚吞絮花香蝶抱鬚婢
翻吹笛譜兒展鬪棋圖簾幕東風軟聲聲聽鷓鴣

棲霞山卽事

笑咏層崖疊巘中破烟清磬響珠宮半窻花氣晴薰日
一座香光細舞風隔塢鶯啼空翠綠入雲鳥帶落霞紅
登臨不盡探奇興欲馭羲輪到碧空

柳枝曲

青青楊柳枝醮雨飛寒玉咲對畫眉人可似儂眉綠

秋夜

暮雲扶月上簾鈎石竈茶香沸小甌落葉滿庭風自掃

一聲砧杵萬山秋

遊秦淮

煖風烟柳盪雲光笑擁笙歌醉夕陽一碧清波流不盡
鶯花猶帶六朝香

河房客聚酒香飄羅綺喧闐武定橋笛步尙留餘響在
隔江山色擁輕橈

移竹

藥欄餘地一弓寬移得鄰家竹數竿愛煞清陰搖鳳尾
一庭蒼翠拂雲寒

倪宜子

浙江浦江縣人倪仁吉之姪女也

倪仁吉姪女宜子詩引宜子天姿穎異機警靈
巧凡琴棋簫管詩畫針繡靡不通曉因所天留
燕久而不歸往從之遂卒于邸寓哀哉生平著
作甚富悉皆散失偶從敝篋中得數首爰付劄
劄以志感云

歸寧得家姑詩步韻

征鴻過處得瑤箋不見鸞軒意倍煎澗畔尋花思舊日
林邊聽鳥俟他年煙雲變幻山仍在人事淒涼世已遷
擬訴睽違千萬恨幾回捉筆淚潸然

立秋有感

一葉梧桐大火流如何令我蚤知秋裴姬懷遠思裁練

蘇子羞歸欲做裘短篷吹來皆別恨瑤琴弄罷盡離愁
凭闌空盼新鴻至那有音書付與收

朱氏

江蘇銅山縣人適同邑某賦性不慧故氏所著
不甚愛惜集遂散失

秋月

漠漠浮雲斂清光萬里同粧臺初展鏡戰壘乍開弓雲
魄依桐影金精落桂叢姮娥好珍重秋到廣寒宮

夏日卽事

午夢初回日正長綠陰濃處納微涼迎風披拂龍孫舞

助雨翩翩燕子忙一卷詩篇遮倦眼數聲鳥語送殘陽
貧居亦有隨時樂野蕨爲羹麥飯香

送春和韻

飛花落絮惹煩襟無計留春強自吟昨夜夢隨零雨斷
少年心向逝波尋一樽酒耐斜陽暮萬斛愁凝芳草深
最是子規知此意更闌殘月叫空林

移居二首

三十年來此地居一朝遷去意難舒蕭然行李無他物
珍重隨身數卷書

惆悵今朝別四鄰多情女伴各傷神更憐來歲梁間燕

社後應尋舊主人

古劍

利器原因錯節傳
獄中沉抑未須憐
一朝垢盡鋒鏘現
虹影長懸日月邊

楊珊珊

字珮聲浙江山陰縣人
布衣楊賓之女適臬使

金祖靜

鄉思樓

旅寓金閭五十秋
親年多半老依劉
嗟予未識鄉關路
廿載空登鄉思樓

鄒溶

字朗岑江蘇吳縣人也
適洞庭西山蔡書雲

七十二峯足徵集鄒氏各溶字朗岑吳郡人適西山蔡墨濤書雲墨濤遠宦靈武太翁在堂年高道遠不克迎養夫人雖隨任而心切侍奉孺慕之誠溢于言表至其貴而能勤富而好禮實稟鄉飲賓鶴峯先生之家教云

上堂上翁

人生養兒原待老
膝下承歡免煩惱
不須鳳脯與龍菹
親手羹湯進亦好
去年隨任之靈武
翁顏遠隔心如擣
因思烏有反哺心
人豈茫然不知道
舉頭雲樹路迢遙
雁信魚音望空禱
深慙侍奉禮闕如
問安視饜不及早

期頤惟有祝長春紫誥泥封榮壽考

咏美人峯

一峯窈窕伴芳叢不比巫山隔幾重秀麗忽來靈鷲翠
端巖如整望夫容雲鬟半暎花臨砌鸞鏡初開月掛松
擬上陽臺無好夢任他朝暮雨雲封

讀漢書

信史偏從女弟成漢家巾幗擅才名等閒莫笑裙釵侶
一代人才待品評

蒼潤樓坐月

千門人靜月朦朧蒼潤樓頭料峭風坐久不須還秉燭

愛他花影滿庭中

劉月卿

字愛蟾里次無考

孫貞媛詩

女子貴守貞守貞命何惜掠賣陷媼娥三槐溯赫奕感
此捐軀學乃翁一門忠烈皆精白梅花嶺上欲招魂丹
心已化山頭石

次韻題明妃圖

蕭瑟西風塞艸稠漢廷遙隔謾驚秋阿嬌空說藏金屋
侍寵何曾直到頭

張靜

字秋山江蘇華亭縣人適奉賢縣莊與偕著有

清閨集

閨秀曹鑑冰清閨集序余乍歸張氏時小姑秋
山方六歲姿韻秀逸質美絕倫能誦內則諸篇
及列女傳稍長嫻習女紅針線之餘頗耽吟韻
香奩中能脫粉黛氣且喜限險韻遇一題每見
泚筆立就若宿構然及笄歸莊氏壻曰與偕亦
愛詞賦故聞其奉事尊嫜靜好琴瑟之下於花
晨月夕著作之富更勝未嫁時也辛卯歲歸省
母疾久之染病迨聞父喪哀感莫解病苦轉劇
其間歌詠雖云不減疇曩而已皆言愁之辭矣
越七年戊戌凶問北來余為之悲痛欲絕作輓
歌三十章遣星兒持往哭之與偕留星信宿繙
笥會萃其生前諸稿凡詩詞共若干首令携歸
視余且乞一言為序嗚呼昔我二人學詩之始
俱屬幼齡朱鳥窻中微塵不著劈箋題罷對語

喁喁於斯時也不知有老遑計及死今則死者
不作老者又何緒乎筆墨之事自此漸踈而追
憶當年情難自已因拭淚重讀
畧述本末不敢自匿其淺陋也
莊四得清閨集跋先妣著有清閨集若干卷經
仁和鄂夫人加評長夏無事鍵戶曝書得之故
紙篋中不忍散軼因重為手鈔而謹讀之竊念
子影承先瞻依早失栢捲空存循除增感秋霜
春露莫溯音容茲集幾卽淪堙猶得敬展餘蹟
以想見遺徽為足幸也昔清河舅母曹太君嘗
序先妣集謂自少卽耽吟詠喜限險韻偶拈一
題捷若宿構于歸以後先嚴亦夙愛詞賦每逢
定省燕閒鶯花佳日往往積有篇章以抒情性
當是時沐昇平之景福寫庭戶之雍容刻燭飛
牋留芬未沫惜不及呵毫調墨侍奉寢門今始
得檢尋故篋訪輯零殘雨蝕蠹侵糝糊脫落其
所存者僅什之二三為尤可感已憶數歲時先
嚴嘗語四得云汝母曩所為詩率皆清新可誦
他日或可輯梓庶弗散亡後竟以門戶務冗未
果假令可輯梓庶弗散亡後竟以門戶務冗未

此一編於幾散而復集之正屬厚幸亟授諸剖
刑示後人不敢沒先妣之留貽亦藉以凜佩
先嚴之提命

於萬一爾
小粉場雜記張秋山靜病劇時所作別舅姑諸
什皆悽惋可誦其別書有句云那知終不如蟬
蠹死後身猶在簡編尤令
嗜學人不禁撫膺長嘆也

沼上

溪風吹暖波荷葉田田起滴露翠毛交勻圓瀉珠子游
魚戲其間樂意忘沼泚一勺洵可安江湖莫輕徒庶幾
花發時不隨花入市不然入於機鷺鶴在水渌

海棠吟

春烟冉冉侵簾箔簾外花枝開復落海棠一笑正嫣然

滴露垂垂姿態弱染痕深淺隨熙陽片陰還愛輕雲作
銀屏吹過折風枝繡入羅衣見標格標格翩躚不惹塵
別有深情憐婉約懶隨頑艷競繁香蜂蝶緣何試清詭

堂後新篁解籜風過翛然偶爾拈毫藉舒懷抱

簾外雨初收新篁翠欲流最宜風繪影徐待月當頭一
徑延苔潤千竿拂砌幽旋看筠節勁清助碧梧秋

春雨

春雲濃似墨移雨過園林花徑紅初減苔垣碧漸深輕
寒添翠幌餘潤入瑤琴不盡迎暄感應知寸草心

秋思

樓外南飛雁一聲
驀教秋思十分縈
翻風况值桐初落
過雨遙憐月倍清
幾處紗幃愁織錦
誰家銀甲戀吹笙
不堪病後精神懶
深夜空煩蟋蟀驚

暮春

繁英亂墜粉墻頭
燕子啣將入畫樓
病起不知春已去
吟來况值雨初收
綠陰濃近薔薇架
碧漲斜添杜若洲
九十韶華纔一瞬
晚牕愁對月如鉤

晚景

繡罷閒無事
珠簾捲夕暉
放他雙燕子
花外引雛歸
對酌步夫子韻

綠釀新開菊正黃
君須尋醉酌秋光
人生無病無愁日
得意花前能幾場

莊與偕原韻
叢菊初舒籬下黃
穿簾秋月漾清光
一杯還勸停針暇
相與推敲翰墨場

別鏡

今後雖然暫積塵
知伊尙有未來因
粧樓重見奩開日
好吐清光照玉人

姚靜芬

安徽歙縣人
姚穆先之長女也
適浙江仁和縣

翟桓原能詩
早歿著有碧窻遺集
鄭侍讀江吳

通守廷華沈司臬廷芳
皆爲之序
惜無好事者

爲之壽梓

早秋病起

病起新秋候幽窗繡嬾拈拂匳開藥裹就几理書籤骨
瘦涼先透衣單晚漸添侍兒真解事深下北窗簾

燈花

烟飛蘭燭傍書龕半暗慵挑玉粟含可惜好花開頃刻
始知無盡是空談

張英

字淑華江蘇甘泉縣人適江都縣學生員黃文
暘善畫著有雙桐館詩鈔

擬曹子建驚風飄白日時春堂落第無聊用廣其
意

驚風飄白日忽爾下西山餘輝映遠木悠悠思何繁松
柏蒼且鬱白雲殊閑閑中有懷貞人曠然處其間非徒
樂山水有志摩中天丈夫懷遠大應得乘高軒胡爲老
泉石空遺後世憐相彼凌虛鶴猶羨羽翮全會當奮高
節芳聲播簡編人生何所貴所貴在無愆襟懷自磊落
中心常浩然流光如逝水慎勿虛華年明珠與美玉藏
輝終必宜速回高尚志眷茲芻蕘言

題河鯉登龍門圖

惜騰斗室搖長風壁間錦鱗思成龍揚波鼓鬣河當中
頭角未具鱗甲雄龍門萬仞摩蒼穹縱生八翼層雲封
欲跳不跳喧靈囂我見爲之心冲冲鱗兮鱗兮開洪濛
超然一躍如飛虹雷火燒尾五雲從萬里青霄路忽通
雁字爲春堂作
天門鳳闕總休論鴻漸于達八法存畫裏雲烟原有態
人間波磔盡無痕菰蘆偶爾飛騰起閭闔居然黼黻尊
不是衡陽偏擲筆朱方萬里氣全吞

劉世坤

字同秀湖南攸縣人詩見國朝詩選

有寄

飄零兩載動相思記得離筵共對時含淚未曾傾別酒
背人先已問歸期蘭閨有夢雲山阻繡榻無心針線遲
寄語茂陵遊冶客莫教重唱白頭詩

汪瑤

字雲上安徽休寧縣人諸生書紳女工駢體適
元和朱昂著有拾翠軒吟稿及文稿

寒山

飛雨過羣嶺籃輿陟翠微幽徑入松際輕風吹人衣高
士有遺蹟想見䟽鑿時老屋就深樹寒泉瀉平池墓梅

雙虬龍屈鐵盤高枝緬懷碩人軸借隱賦樂飢已辭梁
棟材自遠太廟犧一門擅文藻淵雅良可師予亦慕高
隱願采商山芝鹿門期可遂懷古生遐思

李美儀

浙江鄞縣人李杲堂鄴嗣第四女適林某詩附

杲堂詩鈔

輓吳烈婦

決明草階前橫獨宿鳥林中鳴聽風悲烈烈對月孤零
零一日死千秋生

和家大人草堂課耕元韻

高疇新雨足布穀喚春耕千畝廻村綠三家結舍平犢
肥田豎喜鳥起草人醒惟有山翁樂悠然候歲成
東舍幽棲處柴門接野田一春滋草徑三月釀花天林
雀喧晨霽鄰雞報午烟頻年收穫好膝下得歡然

王氏

江蘇華亭縣人總憲九齡之女也

句

有風不動無風動不動無風動有風

小紛場雜識康熙年間華亭總憲薛澱先生女詠
扇有句云云爲時傳誦近有邑人張興載以詩紀
之云絕妙千秋詠扇詞蛾眉淡掃顯丰
姿吾鄉在昔多才女幾個楊修賞色絲

莫兆椿

號蘭芳江西縣人適吳著有蘭芳閣

淑性編

閨秀金漳淑性編序略嘗謂言者心之聲言之得失卽以觀人之邪正婦人德言並重雖不貴文亦寧必廢文也古來閨閣之能文者甚夥惟班曹少而徐謝多遂令香草吟皆棄如茂草鞠矣予自壬辰癸巳間從外氏之銀城署耳熟吳夫人之賢且才并悉予外氏與延陵公以世譜而附寅恭予與夫人從外言之亦講誼也因求其言辱惠近著不下數十章諧聲按律諸體畢備其性情溫淑丰範端凝宛於警咳間全神畢露是以徽音而儲福履者非夙慧卽天才其果莫致而致莫爲而爲者耶予愛之重之妄思藉其言以誌予心也爰爲弁言以歸之

渡錢唐

澄江一碧烟光素浪湧晴空衝曉霧海門倏忽午潮生
巖灘千里驚濤怒商船接跡何處來滿目秋帆無恙布
宦遊如水載輕舟能平險阻舟如步墨池凝露筆成花
望澤人難更僕數移家泛宅此追隨鼓柁憑君夕陽渡

贈蘇世母金孺人

譜系彭城舊魯山壺範新不緣門地貴早識性情真柳
絮吟風暖椒花筆露勻香閨遲驛使紙帳獨愁人
弋水波恬日銀城月上時一簾梅鶴影兩地樹雲思文
墨論交永天涯聚晤遲相期香草贈盟手復臨池

賦得春水綠波

春到池塘媚天開
瀲灩波鏡雲搖淺
綠鱗縠縐輕羅霽
色烘疑染漣紋樣
復拖漁粧窺髻濕
燕剪起眉才
浮光遠披簑罩影
多新蒲明夕照
清景更婆娑

登吳山贈淡菴道姑

探竒忽向最高峰
客裏遊仙覓道蹤
菊徑秋開金鎖鑰
花臺雲捧玉芙蓉
地緣人傑新芝秀
路隔天梯斷谷封
物外相逢真不易
山深遙聽暮林鐘

題海棠小幅

也向三春立品偏
將四瓣分姿自是
佳人難賦休嫌工
部無詩

着紙幾添紅粉含
毫數點烟光筆下
春風何恨憐他淡
色濃香

頤芳集卷之三十二目錄

才媛詩

古歙訥菴汪啟淑選

陸觀蓮 五首

童淑 七首

顧信芳 八首

沈璿 一首

韓古真 二首

倪瑞璿 七首

爰默 五首

王碧瑩 三首

沈瑄 二首

馮愛珠 四首

吳氏 一首

毛柔儀 一首

毛淑儀 一首

歸蘭珍 二首

閔懷英 七首

揚天孫 八首

賀桂 一首

頤芳集卷之三十二

陸觀蓮

古歙詡菴汪啟淑選

字少君號雨鬢道人浙江嘉善縣人適桐廬及
丹生著有蔣湖寓園草

吳江縣志陸觀蓮字少君及丹生妻能詩與丹
生相唱和女默字季齋七歲通孝經九歲能詩
年十六歲母卒默願隨甫三日亦卒時康熙丁未六月也
橋李詩繫陸觀蓮字少君別號雨鬢道人嘉善
石輝里人也適桐廬及山人丹生山人初居吳
之專諸塔右後隱震澤之西村草屋蕭蕭烟火
時絕惟與道人唱和比舍聞歡笑聲則道人詩
成山人擊節而歌林鳥棲宿皆驚起子訥女默
道人恒授書焉山人有詩曰室中有高士十年

樂飢虛又曰憐渠最幼小獻歲解吟詩蓋自詡也復移住嘉興盛澤三年最後以避水患隱嘉善蔣湖之西園亦三年康熙丁未山人將攜家入九峯道人忽病而逝又三日女默亦逝山人當秋風蕭瑟中夢文為言大人頃在舊隱病兒日進湯藥又夢道人言我母女以好禮斗持佛號蒙紫府收錄更名女

日瓊真與羣仙遊也

余南史雨鬢道人別傳雨鬢道人者桐廬及山人妻也與山人偕隱讀書通詩古文辭中歲棲心梵品故自號雨鬢道人向從山人隱于吳之專諸塔右山人好客道人能佐之山人嘗中客謗尋得解去而隱震澤之西村幾及十年唐陸魯望鬪鴨欄卽其地也有池尚存草屋蕭蕭風雨經旬煙火時絕道人授子訥及女默書晨夕吟詠不廢山人嘗遠歸囊無錢瓶無粟桁無衣杯盃無酒比舍聞歡笑聲則道人詩成呈山人山人擊節而歌歌已和之又歌夜中林鳥棲宿皆驚起隱盛澤者三年則山人已倦游矣倣君平故事賣卜客至好客如故山人注莊子道人

從問秋水一篇有問答數條載山人文集中最後以避水隱蔣湖之西園亦三年山人將攜家入九峯道人忽病而逝又三日女默亦逝山人哭之哀蔣湖又言其女未字能詩同時亦化去事頗靈異自有傳初道人母夢大士授之蓮花而生故名觀蓮字曰少君蓋武唐陸氏第四女也山人名世多知之故畧弗書又稱山夫氏一曰貫齋

及丹生先妻亡女權厝合誌略余妻陸氏名觀蓮字少君別號雨鬢道人年十九歸余共案讀書常至達曙年三十七遇鼎革余始貧困年五十九丁未夏六月以疾卒于蔣湖楊氏之西園權厝北重圩之原厝之日女默又卒附焉默字齋季小字墨姑通書史工詩年十六未許字銘曰我為男子恨不識字君乃婦人獨知大義處困益恭在厄彌厲曰歸舊鄉終違故里有女有女如師如弟地下

周旋尚寤無寐

蔣湖寓園對月并序

夫觀千劍者能劍觀千賦者能賦服習衆神豈不然哉余少依姆師僅通章句長隨夫子遂曉詩篇柳下棲遲未見薦禽之客隆中高卧誰爲友葛之人以是同梁生之出關深慙德躍異少伯之辭越不美夷光長與蠹簡爲親蕭條三徑獨向芸編爲伴離別經年兒旣能文女亦識字歷冬夏以靡輟慣飢寒而不啼旣而遊子來歸不殊師友之對時有高人造訪實多贈答之辭稍知工拙之分略窺正變之則荏苒數載常如不繫之舟留滯他鄉盡是若浮之使昨因逆水來止斯園門掩深邨對垠珩之个个人歸遠浦泥雨雪之紛紛盼望故廬不逾衣帶言旋舊里終隔山河落花與芳草相依明月共清風自舉顧此幼女夙慕古人如左氏之有芬才華茂茂在荀家則爲灌志略英雅朱粉不施自是蓬門之質丹鉛能好居然林下之風以此消愁可知矣嗟夫篇章耽玩詎爲失意之悲兒女關情不作無家之別况間邨公築室植松桂以相招陶令卜鄰樂晨夕而不返興言在適益復牽懷簡棄舊篇獨存新什豈徒誇謝庭咏絮蔡閣聞琴

而已
焉哉

青天挂明鏡輝光照我牀展轉不能寐起坐空徬徨徬徨亦何爲日思我故鄉瓶齋舊隱處乃在茜水陽廿年幾播遷渺渺天一方回思手栽樹橘柚徒含芳安得生羽翼摩天一翱翔

念沈氏老姊

昔聞桓山鳥四海各分飛念我同生子四女相因依辛苦效反哺力盡心亦微仲姊久長逝淚落不可揮所遺我三人戀母願空違伯也失所天忍死鞠孤兒兒年近四十與婦同分離熒熒一孫女遣嫁時來歸上堂問祖

母終朝無苦飢嗟予季與叔相見時亦稀撫琴彈此曲
此曲聲殊悲

寶劍篇贈外

吁咄哉荆卿劍術既不成雖有寶劍徒空名千年黯黯
閉秋水雙匣渺渺埋龍精狐狸夜鳴風雨惡蛟螭晝舞
波濤驚我持此劍若明月衆星朗朗隨其行又持此劍
若白日羣妖退走欖槍平欖槍平衆星沒送君贈君君
莫惑古來遇合自有時神物出處當知之

辰山步虛詞

鬱蕭宴罷列仙歸彩鳳青鸞各自飛勅賜珍珠三百斛

滿身瓔珞遶天衣

焚香讀道書

紅窻花影自紛紛一卷常持冰雪文却憶夜深禮斗罷
彩雲遙送小茅君

童淑

字一周安徽含山縣人童若晦之女適同邑胡
敷菴著有傲霜草

清詩備采童一周爲全椒學博若晦女襄陽別
駕公孫女世居含山幼聰穎年十八隨祖之任
所年餘後歸里適同邑胡君敷菴生三子長子
錫初早年遊泮食餼敷菴職授州倅不干仕進
繼以同鄉張君宦遊江西招之偕往甫一載卒
於客幕一周聞訃悲恨不已越數年以疾終

送夫子入燕

此別宜珍重臨行反默然寸心繁岸草隻影類飛鳶策
蹇千山蠹行囊一劍懸相期秋色裏尊酒坐花前

得兒書喜聞病愈

甫得平安字猶叅疑信間審知兒病愈差覺母心閒
下頻開帙愁中一解顏歸期應不遠莫恨隔雲山

憶舊

荆楚歸來二十秋月明時夢漢江遊瀟湘夜雨頻澆酒
鸚鵡川晴可泛舟冰署遺花多手植畫梁舊燕枉窺樓
寓形本自如萍梗過眼風光付水漚

初秋

寂寂閒庭又是秋夕陽西望暮雲悠荷衣濕露含清怨
草帶牽風織遠愁砌冷無花堪對酒天空有月可登樓
他鄉客夢知多少曾入香幃落照不

佛手柑

來自衆香國擎拳效槁禪多因厭五濁故結鼻根緣

哭夫子

不堪移步立花茵觸目驚心倍愴神時至羣花依舊發
可憐不見種花人

深悔從前促遠行無端風浪恨難平他時泉下相逢日

猶怪當年太不情

顧信芳

字湘英江蘇吳縣人翰林院庶吉士顧秉直女
適諸生程鍾著有生香閣詩鈔

盆梅盛開花前小飲

東風布陽和瑤華散芳樹昨夜明月中美人自來去香
醕湛清尊笑言足真趣欲謝區中緣待得象外句

山中作

高梧半夜風吹墮西山雨幽室生微涼清陰滿庭宇朝
來日杲杲行行采芳杜游目睇晴空新雁橫秋浦

折楊柳送漢求弟游粵東

昨日送春今送別津亭楊柳傷行色擬折長條繫客舟
一夜東風吹作雪朝來吾弟去鄉關千里飢驅鬢欲斑
嶺南風土殊不惡此去休嗟行路難况君本是龍門客
好向懷中探白璧男兒遇合會有時惜別何須淚沾臆
楓江江頭楊柳青姑蘇城上愁雲生扁舟若過香爐峽
莫聽林間杜宇聲

送漢求弟入都

柳色銷魂渡離亭日暮時送君從此去回首不勝悲白
髮兩行淚青山萬里思秋風若相憶好寄鵲鷓詩

和雪香季妹逸園話舊韻

懷人春正好獨坐黯神傷
遠水移蘭棹高齋集雁行
泉烹白玉茗酒進紫霞觴
古調傳焦尾新詞寫硬黃
彈棊銷晝永剪燭話更長
共惜當前景休縈別後腸
簾開花撲硯幔卷月窺床
養拙聊名逸忘形半似狂
五年重聚首三徑未全荒
但得天倫樂神仙亦渺茫

正月二日喜雪

誰剪冰綃六出葩
同雲萬里散銀沙
酴醾獻歲猶含凍
梅柳先春已著花
漁浦衝寒迴釣艇
溪橋覓句到山家
一甌香茗憑欄處
又聽林間噪晚鴉

山居坐月

倚石坐空庭巖深鳥飛靜
月斜人未眠松枝弄清影

春陰

料峭春風透碧紗
輕寒不散樹頭鴉
晚雲閣住廉纖雨
半是催花半養花

沈璿

浙江錢塘縣人

壽姚母

五十逢初度芳辰正
九秋瑤池金母現錦悅
玉卮浮懿德光前
緒冰操裕後謀採風從
史奏彤管並揚休

韓古真

字月香廣東海陽縣人詩見潮州府志

和江南閨媛巫凝黛梅花詩

寒來猶自着冰紗泉石清冷雪影斜月到溪頭渾作玉
笛吹樓角落無花騎驢杳杳愁多路放鶴迢迢憶泛槎
冷落黃昏香一片不由人坐不知嗟

幾回長望幾行吟香到梅花沒處尋紙帳鴛鴦魂侵夢冷
烟鐘月色入簾深不因人熱冰成性獨與琴閒水是音
試問春來松口信定知佳句萃芳林

原註真天祐
妾時客松口

倪瑞璿

江蘇宿遷縣人徐起泰之繼室也

過凌城廟謁古戴二公忠義塚

古諱達可戴諱國柱同以忠勇見知於可法史
公時史公巡撫淮揚懷宗十四年流寇袁時中
寇睢古時駐宿邀戴往擊戰於凌城廟眾寡不
敵俱死焉史隨遣使致祭命於所瘞地刻石立
忠義塚嗚呼二公真烈丈夫哉丁酉秋子同母
氏往過拜其墓深惜其事之未傳於史也因爲
詩以俟輶軒之採

秋風鳴高空亂峯下斜照老樹枝交天蒼黃覆古廟入
門捫殘碑太息拜遺貌憶昔明運衰羣盜起聚嘯勦撫
兩失策蠶蠹變虎豹所過無堅城蒼生任凌暴二公真
人豪忠貞出天造金鐵冶成心冰霜厲寒操賊鋒一朝

逼矢石躬親冒官小誓捐軀力薄那自料慷慨互爭先
從容共談笑燃砲擊賊人天地爲震悼賊用魘魅法自注

命裸婦人拜砲反震

蟻聚蜂屯到衆寡勢不當頭斷臂猶掉成仁

併取義日月爭光耀碧血灑平蕪賊馬不敢蹈至今曠
野中白日常見燒如何八十年薦紳少憑弔姓氏已稀
傳父老猶相告蘭臺事纂修幽微須闡耀誰爲秉筆人
搜求不遺與

四弟懇予易其名字取文王世子語爲更名曰克
昕字徵子因詩以勗

人生重賢豪不在名字美難以易相方赤將白白比豈
遂足追配效輦空復爾四弟性明慧翩翩致可喜世業
下相城生來故家子先人早棄世淪落來居此家毀不
謀歸僑寓貧如洗晝荻復和丸提攜賴母氏就傳勤誦
讀弱冠終軍齒挺然才氣雄籍甚聲華起爾字與爾名
呼之有年矣忽然厭舊稱十呼嬾一唯向我索更之我
特不敢諉文取世子篇義載大戴禮宋郊變宋庠飲香
從此始名氏新改初譬若居新徙努力事葺修棟梁庶
不圯莫若江南橋踰淮化爲枳

戲贈山人李老

李山人年已翁可憐白髮顏猶紅矮茅屋是爾宮青藜

杖是爾童烟霞滿懷邱壑卧夜呼骨痛朝呼餓戚施舉
步行逡巡天意厚汝汝莫嗔汝不見孫臏成名無一足
苻堅快意得半人

樊大舅客金陵有詩弔方正學先生墓次韻

金川門入北平軍叔父周公逐嗣君碧血一區埋十族
青山千古護孤墳祠依忠烈緣同志薛蝕碑銘認舊文
樵牧那知青史事經過也復弔斜曛

閱明史馬士英傳

王師問罪近江濱宰相中書醉未聞復社怨深謀汲汲
揚州表到血紛紛金墉舊險崇朝棄郟塢多藏一炬焚

賣國仍將身自賣姦雄兩字惜稱君

國朝詩別裁集王師南下閣部告急掩耳不聞視
賈似道之不救樊城尤爲人頭畜鳴也究至殺身
亡家遺臭終古末路安可問哉奸雄二字曹孟
德輩足以當之予以奸而不予以雄具有卓見

金陵懷古

石頭天險壯層城虎踞龍蟠舊有名峙鼎三分吳大帝
渡江五馬晉東京高臺鳳去荒煙滿廢苑螢飛茂草生
往事不堪頻想像夕陽西下看潮平

憶母

河廣難杭莫我過未知安否近如何暗中時滴思親淚
只恐思兒淚更多

及默

字齋季小字墨姑浙江桐廬縣人後僑居嘉興
及丹生之女也著有閨隱集

橋李詩繫及默字齋季小字墨姑嘉善及丹生
山夫之女母曰陸少君姑生而奇慧九歲能詩
山夫有元旦家集聯句齋季首唱山夫好遊與
母屏居故詩益工然刺繡刀尺亦無不入妙兼
工小楷畫摹李龍眠白描大士年十六未字母
死三日亦卒常愛管夫人畫竹一幅與同卧起
并玩好文石子十許枚小白菟器二器凡零香
斷墨殘繪刺繡山夫悉內之棺著有閨隱集
孫治墨姑小傳墨姑名默一字齋季武塘及山
夫之妻母曰陸少君姑生而奇慧父母絕憐愛
之與兄訥同學于母氏九歲能詩時山夫流寓
吳江有元旦家燕聯句姑占首倡顧茂倫選入
吳江詩略中山夫久困厄好客游家人日晏舉
火或不炊歸而聞吟誦聲則大喜及解橐中裝

空無有也少君必相慰勞曰君行良辛苦願問
見子輩饑寒姑與兄必繆辭對山夫輒大笑後
兄年漸長亦漸能游獨姑與母居窮益久詩亦
益工母授之女紅凡刺繡刀尺無不入妙習小
楷摹畫李龍眠白描大士幼嘗觀母與兄奕忽
指示兄某劫當修母與兄皆大驚自此遂解奕
姑自乳抱從父母客他鄉後返蔣湖三年尚未
一至故廬相距幾一舍中外之戚不識一人山
夫攜家入九峯未行而姑以母病病泣曰脫母
不諱兒願同往母領之母卒之三曰姑亦卒時
人異焉姑年十六未字先一歲和辰山步虛辭
三章云多緣悞折瓊枝樹謫下瑤臺十五年蓋
詩識也姑容貌端麗聲影不出于閨十歲時吳
越間驚傳有詩禍姑向母乞自裁母笑曰此譌
也乃止其天性毅烈如此愛管夫人畫竹一幅
與同卧起并玩好文石子十許枚小白菟器二
器凡零香斷墨殘繪刺繡山夫悉內之棺後簡
少君奩中有蔣湖寓園草一卷姑與母倡和之
作也出姑
手錄獨存

齋季閨隱集自跋略默三歲飄零從二親于外
郡十年夢想思一返於故園蔣湖以避水面來
舊廬若望洋而止老母倚北堂而興嘆中夜挾
寶瑟以長吟非無慰藉之詞實多於邑之調晨
窻乍啟琉璃之硯匣自隨夕幄徒薰翡翠之筆
牀不去以是長見笑于鄰女不解看花或見謂
于閨人何知鬪艸情緣此遣緒以此深矣駕言
當秋攜家渡柳攬九峯之奇勝髣髴金庭專一
壑之幽閒飄飄雲嶠精瓊廡而延佇齊王軟以
上馳曰父口兄尋采藥之赤松旦暮可遇為母
為女盼傳書之青鳥閨閣非遙爰奉命于慈闈
篇分甲乙冀流輝於彤管字辨宮商庶幾染翰
而成不須石墨含
毫以待有取香茅

和母寶劍篇贈兄

牀頭夜半雙龍吼光攝羣妖暗星斗風雨霹靂一瞬間
木拔沙飛石亂走古來神物本平常遭時遇主生晶光

拂拭霜花將解贈時無烈士空徬徨空徬徨莫太息木
蘭唧唧當戶織阿兄少年射白額歸來摩挲看太白

憶震澤西邨

忽忽難忘處西邨明月中荷花低拂露菱葉靜含風烟
火經旬斷音書隔歲通茅堂知在否應有白雲封

和母寄父

白髮親闈百里遙那堪風雨更蕭蕭山中對酒愁應減
客裏看花凍未消覓向小時追謝韞著書他日擬班昭
夜窻彈出思歸引阿母相依慰寂寥

辰山步虛詞

蓬花自製碧雲中香案前頭慧業人朝罷捲簾垂紫袖
高歌一曲太平春

闐闐初開黃道邊鳴鐘伐鼓會羣仙多緣誤折瓊枝樹
謫下瑤臺十五年

王碧瑩

山東長山縣人太常寺少卿王楨從孫女也適
同邑趙戴庭著有遺詩一卷

春愁

春愁轉無賴散步出庭闈低首問芳草王孫歸不歸

聞鴈

雁聲秋不斷阿弟卻無音千里陽關路搖搖一寸心

寒食

芳草青青柳放芽東風搖曳幾枝花宵燈不乞隣家火
春月如波浸碧紗

沈理

字未男浙江嘉善縣人順治己丑進士工部主
事丁彥元配

橋李詩繫沈夫人理字未男嘉善人順治己丑
進士工部主事丁彥元配彥妾鄒蓮午亦能詩
相繼早沒繼娶吳中燕嘉興人頗解文義性高
寒放跡山水以終王端淑謂理詩刻畫入情處
直令物無遁形雖少
陵復起不能過也

卽事二首

山萼紛紛出槿紅
月窻有句向文同
鴛鴦錦下支機石
可是相如軫上逢

睡起春慵拂曉颺
攪人幽夢是黃鸝
一竿犢鼻隨南阮
何事綿綿催畫眉

馮愛珠

字掌珍江蘇常熟縣人

次韻題明妃圖

風沙怯見塞垣稠
腸斷邊關萬里秋
何事長門多怨思
夢魂猶攪五更頭

夏烈婦

如臯顧琢玉之筵室也顧病卒大婦欲逼嫁之夏不從飲鹵死

素帷同是未亡人
主婦相殘性未馴
妾是瓊花移不活
莫教重辱雪兒身

孫貞媛詩

寶鴨香迎玉洞仙
還將坎坷話當年
孤標銷盡繁華夢
冰雪凝寒松栢堅

符召箕壇降紫姑
爭吟白雪弔仙姝
兒家留得神鍼在
繡幅雲卿小像圖

吳氏

浙江嘉興縣人也

橋李詩繫吳氏嘉興人銓部某之女才色俱絕以所配非偶不自檢束致訟後流寓金陵

吳舟中

一泓秋水浸羅衣
月色依舟淚滿幃
皓魄不隨風落去
空留怨骨伴郎歸

毛柔儀

字嘉則江蘇寶山縣人諸生毛純女也

題嫂氏吳絳衣游仙詩

丹書金札寫游仙
譜就巾箱位業篇
二十六峯來往熟
雲璈低奏閬風巔

毛淑儀

字幼芬毛純次女也

寄表妹吳淑英

億昔來粧閣
依依共起居
如何三載別
不得一行書
遠道雲煙隔
相思涕淚餘
末由通問訊
西望渺愁余

歸蘭珍

陝西華亭縣人適金某

蠶豆

羨煞江南是麥秋
縹絲聲裏豆盈疇
青連菜圃叢叢秀
綠綻蔬畦粒粒柔
已與鶯桃稱契友
還同竹筍結良儔
請看無限田家樂
戴勝鳴時莢盡收

憶兒

想汝實孤栖風烟逐馬蹄焦勞私自惜誰與諾悲凄

句

白龍深洞隱丹桂遠浮香

竭力機杼作女工

閔懷英

字晚餘浙江錢塘縣人適昌化縣方祐俊著有

蘭軒吟稿猗香樓吟稿晚餘小草

閔秀應學韞猗香樓吟稿序閨人詩柔媚者居多而温厚清婉即名媛一集亦僅數人由其見聞不大境界不遠耳同里晚餘夫人事舅姑及父母皆以孝聞為吾鄉閭範善本書插架萬卷

窮治者廿餘年有所觸撥輒發為詩歌故能洗盡鉛華獨存至性昔歐公謂謝希孟有幽閑淑女之風晚餘其近之矣余慕夫人之為人與詩久已後獲交得親顏色夫人不棄聾瞽枉以古今體及綺聲千餘言示險諷久之媿不及萬一因小誌簡端未足以盡夫人之遠者大者也方祐俊猗香樓吟稿跋嗚呼內人事父母奉舅姑勗予訓子暨待臧獲藉藉播姻戚間楮難罄述述其性所近者自捺聞政外躬經史喜文章尤以詩為最憶予始結褵內人深自韜諱及予知之則曰此非閨閣所宜慎勿使家中人知也然體弱多病鍼紉外無愜意者復肆力于詩數十年來積累成帙遂甄別先後共成若干卷先是外父母僅育內人朝夕依依不忍離膝下子嗟涕洟寢食屏廢其間寧母心杼已鬱往往盡托諸詩家大人鑒此衷曲乃得卜居于杭嗚呼廿年來兩地慈幃仰承曲體温清無缺不聞片語齟齬孰非內人之調護而心力耗頓病日不支率由是起故全集所載居大半焉內人既抱

羸疾米鹽瑣屑日夕經心醫診之方實出岳父力自丁卯秋岳父仙逝神益慘體益厄淹淹枕席間未及一載而病遂劇臨危向予曰父母恩勤此生莫報生平行略日思哀集以示我後人母之橐本大半久藏腹中向以兩腕力憊未搦管錄存父事則毫未搆集今皆已矣無復速也巳言訖悲咽久之嗟乎先君子沒一生事蹟留傳家乘皆內人一手敘之閱者謂詞旨彙括毫無挂漏先君子得以不朽孰意彌留之際俾內人追懷父母抱恨終天予之踟躕不安寧有已也哉內人暮年與珏樓應夫人為閨中知己倡和成集夫人西遊後神倍黯傷亦懶于筆墨年來閒有吟咏與兒女輩口述之集中多未及載今音容杳邈無自追求斯實予之大恨也內人有蘭軒吟稿猗香樓贖墨晚餘小草自適齋集先擇一二詩詞付剞劂氏以質諸世非炫內人辭華聊慰予心寸悵至其全帙姑俟異日云爾

採芝行為夫子五十壽

天姆峯前千尺松虬姿矯矯凌蒼穹下毓紫芝秀九莖
 逶迤谿谷常春風龍飛鳳舞蟠錢邑靈淑所鍾光耀熠
 君自青年來武林慕踏湖山採芝吸墳典探奇邁等倫
 市隱翛然魚鳥親襟期峭直行耿介樂尋名教率天真
 攬揆此日春光懋紫翠青葱開錦畫竹窻病質整釵荆
 手把一觥為君壽憶昔相從弱冠年君時風度正翩翩
 兩地承歡多委曲卜居娛侍得圖全三十宜男花未馥
 舅姑戚戚思抱犢四旬三叶夢熊占而今皆知辨黍菽
 五十今當大衍期羸軀猶獲侍帚箕庭前融洩多佳氣
 兒女團團進玉卮君不見昔賢解組輕五斗門前多植

先生柳田園當日暗荒蕪鱸膾葍美堪憶否湖山風月
怡我情婚嫁逋償築室耕從此名山採芝吸安期有棗
授長生芝山五色芝芬郁博得靈芝歌五福老人拍手
向芝山齊道海籌盡添屋

月夜聞歌

紈扇斂新涼鳴蛩訴夜長疎星渡銀漢淡月照蓮房歌
徹千宵外聲流片石傍坐聽神思逸不覺露蘭香

次韻寄珏樓

東望凝歸眼烟雲嶺上生溪流縈遠思蟬咽訴離情室
靜猊烟瘦窻明蝶夢輕金風吹玉露常擬動回程

送夫子回昌邑

梅花香煖吐清姿正是陽回臘盡時君念蓼莪循子職
余承蘋藻愧齋尸椒花自進元辰頌竹葉先分除夕卮
路過村村忙歲暮催程莫教倚閭思

觀書偶感

富貴浮雲若功名春夢餘古今同一轍何事羨華胥

猗香樓遠眺

東牕日上曉風輕珠戶瓊寮一望明最愛牆頭春色現
鳥聲相雜賣花聲

剪牡丹二枝挿瓶

翠剪翩翩曳步搖三分帶酒十分嬌沉香亭北風流遠
此日東吳見二喬

楊天孫

字雲錦江蘇吳縣人楊編修繩武之女適吳縣
鴻博徵君陸枚著有塗鴉失珠等稿

秋霽

雨過遙空爽孤懷易感傷強歌聊自遣攬鏡不成妝老
桂蕊含馥寒蟬送晚涼幾回成獨倚閒煞好秋光

午夜無寐

月落鐘沉後驚心百感生老姑猶淺土愛女未成行撩

亂絲難理新陳逋未清桑榆催晚景欲寐事交并

立春

旭日朝來籠瑞烟暗香微逗早梅邊律回幽谷光風泛
序轉陽和淑氣宣歲首循環推景運雅懷酬唱記當年
不須巧剪釵頭勝漸覺園林萬象鮮

塞下曲

秋風吹邊塵戰士雄心烈漢祖白登圍計賴陳平設

擬宮怨三首

一入長門春復秋花時月夕總添愁含嬌握管題紅葉
寫就殷勤付水流

夢魂空自戀君恩醒後羊車寂不聞忽聽笙歌喧別院
淚痕潛滴石榴裙
曉來對鏡怯梳粧恨積春山倚象牀一自恩移辭輦後
舞衣消盡舊時香

春睡

遲遲日影透簾櫳細草爭舒氣漸融驚醒綠牕幽夢短
數聲春鳥喚東風

賀桂

字秋安號竹隱居士江西吉安府人也著有竹
隱樓詩然未得見

吉安府志龍有珠妻賀氏名桂字秋安號竹隱
居士士昌女幼聰慧善記父官滁積書甚富桂
懷鉛握槧居然有儒者風歸有珠珠任攸縣令
勲內政卓有賢操後借隱龍溪架樓曰竹隱吟
咏其間著有竹隱樓
詩草子科實領鄉薦

獨坐

晴波如練漾秋江日暮朱霞麗碧窻琴罷鴨爐香欲爇
強拈針線思難降

擷芳集卷之三十二終

擷芳集卷之三十三目錄

才媛詩

古歙詔菴汪啟淑選

浦映淥 三首

吳芳 一首

陳淑嫻 三首

李冽 一首

陶履坦 二首

陸瑤英 二首

韻山 一首

徐安吉 五首

王天載 一首

韓張 三首

李寶月 一首

施璲昭 五首

李瓊 四首

吳雯華 三首

施坤 二首

宋琴諧 五首

宋瑟諧 四首

焦氏 一首

佟素衡 一首

季蘭 二首

姚瑛玉 一首

顏柳 二首

陳治筠 二首

林蕙 二首

沈詠南 一首

張汝傳 六首

鄭慧瑩 一首

顧步 二首

施菊香 一首

徐氏 三首

梁蘭漪 七首

陸吟香 句

擷芳集卷之三十三

古歙叻菴汪啟淑選

浦映淥

字湘青江蘇無錫縣人世居前澗武進黃永之室也著有繡香小集

陳維崧婦人集黃比部名永與夫人浦氏伉儷最篤一日鄒大名祇謨戲比部曰君得毋昔人所謂愛翫賢妻有終焉之志乎比部曰下官正復賞其名理夫人有題周絡隱坐月浣花圖滿江紅一闋詞云彼美人兮宛相對姍姍欲下恰此夕月華如洗花枝低亞盼到圓時仍未滿看當開半還愁謝與花神月姊細商量歸來罷憐嫩蕊銀瓶瀉迴清影晶簾掛奈晚粧猶怯鏡臺初架二十餘年芳草恨兩三更後長吁態幾時將絡秀舊心情呼兒話附錄艾庵往事賀新

郎詞一首往事卿思否十年來幾嗔幾喜相偎
相守漫道悲懽如水去提起心頭都有卿自置
一觴一笑拔金釵鬪指點椿椿欲說還搖手
恐化作幡然叟何妨憤憤居人後更誇甚筆
搖千字胸盤二酉對酒當歌卿試舞長袖離披
紅溜為卿盡先生五斗醉看諸兒羣繞膝待長
成五岳容吾走卿好做尋山偶
湘青繡香集自序略柳絮風多敢望謝庭之句
眉山木老浪傳蘇姝之名然而日煖晝長燕翻
鶯舞頗弄文墨不敢告人近因雲孫北首燕路
寂寂家門偶編舊集復輯新篇珍珠一載羞居
崇報之家象管數言或玷徐陵之選

譴鵲

片片花飛點繡幃強拈裙帶試腰圍欺人最是檐前鵲
說道當歸又不歸

呼婢

銀瓶斜插海棠花春色朦朧護絳紗烟裊獸爐香欲燼
隔簾鸚鵡喚琵琶

牡丹亭

情生情死亦尋常最是無端杜麗娘虧殺臨川點綴好
阿翁古怪堦荒唐

吳芳

字芳英浙江秀水縣人吏部吳竹亭之女適同
邑貢生徐然

馮李詩繫吳芳秀水人吏部吳竹亭女適同邑
徐然字撫辰

寄遠

東風吹就雨廉纖
殘夜無言且獨眠
翠髻未偏羅帳冷
欲憑清夢到君邊

陳淑嫻

號宜齋直隸
縣人適孝廉于振翀寄籍山
東曹縣著有碧香閣小草

梅影

疎影橫階瘦相看
獨掩屏離魂疑倩女
畫手誤明妃玉
蝶迷香砌冰蟾伴
縞衣羅浮清夢杳
芳躅記依稀

燈下示兒融

澹泊長年守素風
菜根滋味讀書功
須知金谷終灰燼
千古繁華一夢中

寄遠

秋風吹雨夜綿綿
枕簟新涼坐不眠
一紙家書和淚寫
濕雲拖雁過牕前

李洌

字在中江蘇崑山縣人

壽姚母

淑德凝祥世澤綿
北堂秋永啟華筵
熊丸砥礪芸窗苦
荻畫恩勤梓里傳
酒泛清樽饒瑞氣
菊浮紫萼引長年

遙瞻錦悅高懸處敬賦南山松柏篇

陶履坦

字固生號嵇散子浙江會稽縣人適大將軍朱

騶元

自嘆

蕭瑟秋風入敝居飛蓬不逐鏡臺虛生來錯認鴛鴦字
嬾覓雙魚寄遠書

春日感懷

蕙蕊蘭芽透碧紗含愁寂寞度年華可憐春色無多許
簾外香塵帶落花

陸瑤英

浙江錢塘縣人孝廉陸鳴時女適仁和諸生湯

頤和以子右曾貴

誥封夫人著有閒窗小草

擬妾薄命

憶昔佳人好顏色窈窕婣娟號傾國合歡雙帶結同心
錦機罷却何須織流蘇彩帳玳瑁床徘徊繡戶明月光
翠椀共傾琥珀酒玉爐不斷鬱金香此際驕奢難再得
此日分飛大堤側一朝征戍向漁陽紫塞迢迢淚霑臆
去時隣兒正少年今時白骨歸重泉落葉辭條芳草盡
手持青鏡心茫然仰視星橋隔天漢黃姑停織遙相看

閨人發婦心易悲天涯客子思腸斷何處城頭烏夜啼
遙聞孤鴈發酸嘶轆轤初轉墮金井銅壺漸歇聞曙雞
胡笳羌管傷懷抱新聲寫出關山道西風黯慘塞草腓
征人百戰沙場老春去秋來綺閣中佳人脉脉閉簾櫳
莫道朱顏今未改錦衾珊枕與誰同

訣別

傷哉腸斷奈何天病入膏肓豈偶然念我有親偏異地
痛兒無母孰深憐魂依夢接眉間事翼比枝連願裏緣
安得超超塵外想雨花零亂遍三千

韻山

天津胡孝廉捷之室也

詠夜合花和韻

嫣紅取次歛幽姿正是檐牙日墮時可惜夜長難得日
重開不見費相思

胡捷芸書閣遺稿序略予友心穀幽羈九載始邀
矜釋與嘉偶合英夫人遂其倡酬之願雨簾刻燭
花徑分箋致足樂也顧綠綺纔張朱絃遽斷拂床
簟冷拳幄香銷泪漬春衫情何以遣心穀既作悼
亡詩若干首情深語苦鵲鳥啼春冷猿嘯月使人
難以卒讀尋復哀其含英夫人前後所作并倡和
諸詩爲一集迹其集中所載大都哀楚之致多而
愉樂之聲少豈詩之果爲人識與抑自知其慧福
不能兼而豫爲是無涯之戚與予嘗深夜對酒讀
之三嘆顧謂內子韻山曰讀此益增人伉儷之感
韻山曰生死固自有命所恨者歷憂患而未竟其
樂耳竊欲卽其集中所詠夜合花之意拈句弔之

可乎予曰閨中偶咏本不可以外播然非所論于
舍英夫人也汝試誦之韻山遂吟云云予爲之慨
然因命侍姬媚川執
燭捉筆而爲之序

徐安吉

字子貞浙江上虞縣人尚書徐人龍之女也適

王玉映之弟王鼎著有詩集

雜詩

浮生寧有涯性靈不可天適自理晨粧遙見東方曉初
風半吹竹寂寂聞啼鳥地僻我亦閒日對南山小

山中詠

老楓俯大谿數枝浮水面清風與之俱吹落秋紅片落

日危孤峯柴門雀喧轉短草動夕陽寒塘石清淺

古意

柳色欲輕黃朱樓人自傷愁來無洛浦夢去有高唐寶
鏡空懸架榴裙驗取箱誰書桐葉字墳草變鴛鴦

感秋

秋清萬點越山多雁陣看來字若何湖氣已經霜後白
雲光猶向日邊和殘蕉落葉迴人夢野菊垂花泛酒波
小膽怯愁蘇病骨寒風相贈益輕羅

春詞

西樓殘月子規情幾樹梨花照水橫自抱琵琶廊下坐

含愁撥得兩三聲

王天載

字春曉湖北黃岡縣人曹本之室也

海棠

啼鶯喚醒海棠枝曉日新粧帶露時謾說楊妃初著酒
寒來姊妹也相宜

韓張

字靜菴江蘇揚州人

黃研旅姊丈以出塞圖索題漫賦

元龍百尺氣若虹跋涉山坳走朔風
褰衣驄馬出塞垣

乘繻壯志真英雄黃塵盡日飛龍沙
萬里荒涼窮大鹵
冷秋八月雪皚皚黑霧連天瘦蛟舞
研旅先生自崛奇
文章重世芙蓉披才華穎脫胸浩浩
眼前豪士識者誰
深閨盥手展圖看咫尺長城見譙櫓
江南春色共迷離
鴻漸青雲勢高舉

和書升宮甥城南觀桃

春雨濛濛水半篙流霜終日醉仙桃
東皇解道清才詠
粧點紅衫映錦袍

飮眼韶光錦繡中沿溪不辨淺深紅
鶯聲似共花枝語
莫信輕埃促曉風

李寶月

江西  縣人

讀香奩集有賦

晝長宜睡嬾梳頭
略展菱花眉黛愁
聞道春江染新綠
傷心時一上西樓

施璲昭

浙江平湖縣人
廣文施鉉女也
適文學沈炳孚

天卒

檇李詩繫施璲昭
廣文施鉉女適文學沈炳孚
早年天卒有詩一卷未刻

獨坐見月

蕭蕭夜色涼
小院驚佳節
病骨不禁風
垂簾待秋月

春日送姊

分手河橋淚滿衣
渭城三唱落花飛
那堪堤畔無情柳
搖颺東風送客歸

秋閨二首

滿院梧桐帶翠凋
竹牕疎雨溼芭蕉
西風吹遍空閨冷
縷縷殘香尙未消

雨過幽庭濕翠微
新涼初覺懶添衣
慵拈針線悲秋咏
幾向西風怨落暉

早梅

點點寒霜飄未盡朝來初見數枝開東皇豈解愁人意
先使庭梅報信來

李璣

字玉樹山東長山縣人青浦知縣李某之女也

適同邑趙伯麟著有梅月樓艸

山左詩鈔李璣字玉樹明戶部尚書長白先生
士翺裔孫氏幼承庭訓工書能詩夫伯麟亦名
家子雅相愛重年三十八而卒有

梅月樓草及詩餘一卷清麗可誦
小粉場雜識山東閨秀李氏能書善詩字玉樹
明戶部尚書長白先生士翺裔孫氏幼承庭訓
工書能詩外君趙伯麟亦名家子雅相愛重惜
乎年僅三十有八而卒所著梅月樓草頗多清
新之什詩餘一卷尤清麗可誦附錄數首于此
江南春風習習水漪漪燕來春意足蝶舞落花

遲碧天斜日橫雲斷自在嬌鶯深樹啼荆州亭
昨夜雨絲風片漲滿綠槐庭院來往遶迴廊無
數鳴鳩乳燕一抹寒烟青燼望斷盈盈淚眼橫
笛畫樓東吹徹數聲清怨花發沁園春穀雨新
晴禁烟初過一番另是春景嬌鶯轉樹蚊蝶穿
花綠遍郊原千頃風來繡戶攪亂了一簾花影
燕子畫梁語呢喃雙雙共說春永日曬幽窗寂
靜案頭碧紗籠香噴金鼎年年歲歲每到春來
添上幾回清夢正濃午睡卻被何人喚
醒牆外不住賣花聲遶院頻呼不定

春閨

重門深鎖寂無塵滿樹花開不見人獨有畫梁雙燕子
年年相伴過殘春

清明

又是清明雨後天綠楊深處見秋千無邊芳草玉孫路

榆莢飛錢柳墮綿

寄外

思君客路冒風霜
獨上妝樓望帝鄉
最是離人腸斷處
長隄衰柳掛斜陽

春望

鳥語綿蠻度短牆
朝霞催起早梳妝
自從不上樓頭望
春色飄零到海棠

吳雯華

字曇素江蘇吳江縣人
適同郡貢生葉景鴻著
有香奩詩稿及采秀閣吟草

歸舟

歸舟傍午泛匆匆
短棹輕帆趁晚風
數點飛鴉殘照外
一聲清磬夕陽中
山光遠近和煙紫
漁火參差映水紅
閒倚篷牕遙望處
彎彎新月近垂虹

秋閨

庭梧葉落氣蕭森
砧杵千家碎月明
何處小樓人不寐
孤檠相對賦秋聲

秋日村居

自愛投閒縱所之
江村林壑漫棲遲
本無喜愠抽身早
須信英雄種菜宜
逸興耽於黃菊候
幽情訴與白鷗知

綠楊影裏三間屋
羨殺漁人理釣絲

施坤

字資生河南儀封縣人
適張鉅卿著有過雲吟

詠古

仗劍出昭關
投吳秉節鉞
一出敗荆師
再起復全越
英風震五湖
霸圖日突兀
奈何長寇讐
忠言不能入君王
賜屬鏤臣罪當誅滅
鴟夷江水寒
天地泣壯烈
轉眼問吳宮
繁華久歇絕
青青館娃柳
冷冷蘇臺月
長嘯海天空
涼飈振林樾

詠殘牡丹

東風吹老碧桃枝
偏爾能開傾國姿
垂首似含亭北恨
折腰如怨馬嵬時
殘香尙足驚凡卉
剩粉猶堪入品題
寄語東君好珍重
莫教風雨葬西施

宋琴諧

字綠綺里次未悉

孫貞媛詩

逃出亂軍中
全家骨肉終孤雛
留一脉飄蕩向春風
淮浦芳姿長揚州
艷色誇可憐
含蘂好飛作路傍花
何處蒙貞潔
輕生傷永訣
森森勁節標松幹
凝寒雪夙具
神仙骨離塵
獨超忽姮娥
可與諧願託瑤臺月

次韻題明妃圖

草向祁連分外稠愁雲不比漢宮秋錦書欲寄南征雁
明月無人數舉頭

宋瑟諧

字朱絃琴諧女弟也

孫貞媛詩

松枝標勁直磊落超凡植蕙雲性孤高拚棄傾城色
竹初含籜出已具凌雲節蕙雲幼絕塵挺作閨中傑
梅花別有香春寒冰雪凍蕙雲化鶴來不入羅浮夢

次韻題明妃圖

怨比長門萬倍稠寒垣嘗遍雪霜秋君王若念顏如舊
征馬無情不轉頭

焦氏

江蘇華亭縣人焦南浦之次女也

題蕉

芭蕉葉芭蕉葉如今折蕉聲絕風有聲蕉無舌雨數點
腸干結

塘南野乘南浦先生詩集中有兒曹剪芭蕉學書
余女二郎書其上云云余喜其有奇致錄而和之
日芭蕉葉芭蕉葉雨蕭蕭風獵獵綠天壤一小劫
綠玉箋臨法帖欲題詩小敵怯為韻所束顧不能
奇也按二郎係先生長女行二後
適明經沈中理年二十八而卒

佟素衡

奉天人 大中丞諱國器公之女孫也 適江寧汪
淡庵

勉兒勤學

庭槐漸覺影婆娑 歲月催人老奈何 晝永爾宜勤課讀
夜深余亦愛吟哦 從來自恃聞偏淺 到處心虛識愈多
美玉琢磨終作器 分陰須惜莫蹉跎

季蘭

字畹芬里居未悉

孫貞媛詩

貞魂久不銷 仙珮何娟潔 迴思小鳳雛 歷歷遭磨折 百
結蘊愁腸 盡向箕中說 瑤池歸去來 妾心古冰雪

次韻題明妃圖

釁起苞苴自古稠 一圖遺恨閱千秋 漢王仗信安邊徼
莫惜傾城棄隴頭

姚瑛玉

安徽桐城縣人

詠園紀遊

村塢雲遮取徑斜 垂楊一帶暗窗紗 風迴樹杪驚棲鳥
水縐波紋聚落花 山色全歸殘照裏 晚煙平罩野人家

閒心共話當年事看汲流泉煮建芽

顏 柳

山東武城縣人適陳國瑞著有偕隱倡酬艸

代外題袁魯望松菊歸隱圖

世人紛紛愛留照閒中染景惟花草自覺形神與衆殊
覽之幾令人絕倒生來氣味不相似撫列羣芳徒贅耳
况復添毫無佳手卽今畫肉比比是惟有袁翁最奇特
生平雅尙惟高潔超然別具世外情觀其嗜好真殊絕
隱居淮北白洋河所好松菊無其他節擬蒼松操擬菊
以視世人復如何世人俗情猶未埽時借畫工寫懷抱
矧茲耿介拔俗士逸情高致胡不好苟無虎頭傳其真
誰爲寫貌兼寫情君貌不外阿堵間君情卽在好尚清
披圖令我長太息袁翁無乃今靖節憶得當年賦歸來
松菊猶存不改色

夏日山居

山靜偏宜暑松風入夢清危巖飛雨色古樹咽蟬聲刺
繡年來課看雲世外情不知塵市遠聊爲證無生

陳治筠

字淇園江蘇崑山縣人余恒齋室著有

崑山新陽合志余澹巖妻陳氏名治筠賢淑工

筆

自拜中書令斯文獨在茲毫裝青縷巧管吐綠沈奇五色才人夢雙彎少婦眉惟君能領取此外有誰知

走馬燈

紙上孫吳善將兵烽烟初起便長征迴環不計三軍數騰踔爭看一騎輕若使獻俘惟捕影任教合戰不聞聲莫憂饋餉難爲繼枵腹何嘗呼癸庚

林蕙

字佳英福建泉州府人著有香咳集

飲新茶

終朝採新茶烹之甫一甌味同仙人掌色與武夷儔飲茲多異趣耳目殊悠悠豁然心胸閒醒睡復清眸人云可代酒我謂酒不侔飲酒能亂德啜茗復清幽玉川與桑苧所以意氣投歎息兩人去高風今尙留

蘭

春山隨意佳雨過香初足美人在何許不語倚空谷

沈詠南

字佩儀浙江錢塘縣人詩附見於墨莊詩鈔

徵詩詠滇南四景

戊辰夏日閒居鹿園書室時花柳參差筆墨在御偶憶幼時隨先君宦遊京都滇黔所過名山

大川指不勝屈其最勝如銀壺磨盤之山六百
里松陰蔽日洞庭彭蠡之水千萬頃鯨浪滔天
至於風花雪月在滇南尤甲宇內曰清風驛地
無纖塵人馬飛渡稍遲即吹去花曰上官花每
朵十二瓣月開一瓣迨冬時爛漫勝牡丹遇閏
月則開十三瓣相傳為仙家所栽云若夫點蒼
山之雪春夏不消洱海底之月朔望皆圓倘所
稱洞天非邪余年幼白腹空疎未經題載敢拜
文妝或詩或畫惠我珠璣咏南之
幸也初不計磚礫之妄投焉耳

南遊千萬里從小客天涯山絕雲飛騎波橫龍戲植有心貪看月無計便移花風雪多奇致觴歌乞謝家

張汝傳

江蘇松江人徐宗頊之室也著有繡餘草

王日藻繡餘草序略余二十年前聞清河氏有女才子工詩詞所著泥美人墨兔諸咏贈傳人

胎居恒好柔翰絕類儒者蓋由天姿穎異日漸
摩於父兄之側尊人明經止鑑先生兄文學慧
曉皆博洽君子人莫能及故無俟明師善導取
益良便也余拂衣歸里卜築秦望之陰不復問
登然之音而徵詩問奇者不以余為無文紛紛
酬應靡有已時竊歎詩人林立授巨卷如薛保
遜亦復不乏今讀繡餘詩雅不欲以四始三唐
泛語為序止序其詩學之淵源詞令之典則有
超於尋常閨秀之外者并欲與其君子歲進士
徐兄宗頊倡和之作合觀之行將俟其續梓焉
可矣若夫事父母以孝聞事舅姑以禮聞則許
觀察張孝廉序之頗悉予又何容贊一詞乎

烈婦吟

萬死捐軀豈顧生從容白練神氣崢昭然大義耀素雪
貞魂千古終不滅此夕天孫會黃姑此時烈婦亦從夫
夜臺宵渺如相見應知不媿生前面人間多少綺羅春

盡保紅顏那保身傾城絕豔安足齒惟有芳名照青史
塘村烈婦

終古世人無超越暮春桃李求榮發駒隙富貴曾幾何
鬚眉頓改如修蛾塘村女子心鐵石釵笄未肯同巾幗
砥胸斷頸獨忘生玉碎花飛不爲名紅顏多少埋黃土
誰能青史垂千古巍巍廟貌享明禋不是龍章翟帔人

天竹

種自西方迥不同勻圓萬顆結玲瓏丹枝不改三冬色
翠葉能禁午夜風縱使未收書卷內也曾譜入畫圖中
莫教烏啄珊瑚墜留占東皇第一紅

鉄馬

珊瑚應擬佩環輕清徹如聞秦女箏庭畔驚殘棲鳥夢
樓頭敲動玉關情高垂髣髴花鈴繫驟響依稀鐵騎行
占得一年風力健不知吹作幾番聲

秋思

霜林葉影踈搖落感金氣蕭瑟淡秋暉西風吹絡緯

早桂

日暮幽窗暑氣清微香冉冉襲衣輕忽聞鸚鵡籠中語
金粟如來已降生

鄭慧坐

字明湛浙江餘姚縣人山西僉事鄭之尹女也
適倪之覃

答子封外君

青鸞有信孰傳愁目斷天涯倚斷樓東河渡口帆千片
知道君歸那一舟

顧步

字佩微江蘇青浦縣人徐舜庭之室也著有絮
愁集

題允恭姪書齋

芸牕景物不尋常巨細安排盡有方粉壁畫懸山色古

銀箋書染墨花香清幽料易搜佳句風雅還堪遣斷腸
從此呻吟須倍力朱衣今頗重文章

偶成

瀟灑花陰月清光分外增倚闌貪玩賞一任鼠窺燈

施菊香

字澹如

孫貞媛詩

人生天地間渺若輕塵影弱草向秋零最苦風霜冷女
子倚所天宜將名節秉杞婦崩高城殷姬匿智井烏鵲
感傷懷黃鵠歌交頸紈扇粉書揚皮金香字炳此身旣

適人偷生因何忍我憐孫蕙卿更履阽危境失怙慘初
孩殉國嚴親殞繞膝索銀魚宦邸烽烟警隨姆歷迍遭
蹙蹙嗟靡騁長大寄他鄉嬌藏想閒靚伉儷幾曾諧落
籍添悲哽粧臺淚暗彈鉛華一朝屏但免辱泥塗殺身
亦云幸烈婦報其夫女貞尤可憫松筠節早堅中閨發
深省惜哉閱世深良璧埋崑嶺築臺記懷清式廬知謚
愍綽楔佇 恩旌會藉當途請

徐氏

浙江石門縣人大學徐公行灝之女也適化州
知州承勳元年三十三卒贈宜人

菊

東籬挺數枝寒英映繡幕豈如桃李花深春已零落

秋夜

月華澄徹露華鮮簾捲高樓人未眠萬籟無聲清夜永
如聞笙鶴在遙天

雁字

蒹葭白露兩茫茫欲寫離騷第幾章若到衡陽腸易斷
迴文題罷下瀟湘

梁蘭漪

字素涵號蓉溪江蘇江都縣人也著有晚香樓

詩稿

雜詩二章

幽谷生芝蘭不同荊與杞本是王者香肯隨秋艸委同
 時深谷花出滋秋露華一隕嚴霜後零落道傍嗟
 南山有仙鵲不飲復不啄養成五色羽冲霄凌白鶴回
 視疾飛鳥自謂翔風樂盤空三五步已遭金彈落

題方婉儀白蓮圖

十里抹紅粧一枝瑩玉骨風定欲停雲波橫疑濯月灼
 灼桃李花春深叫鷓鴣青青松柏枝嚴冬凜霜雪爭如
 九品分仙胎此中結花共人同清人共花同潔天地生

斯文終與塵流別

漁家

一舟大如葉妻子同棲遲垂釣滄江上不侶輕薄兒蓑
 衣薄紫綬箬笠傲金龜巢許為吾友蒼旻是我師得魚
 沽斗酒妻舉案齊眉興來歌短什惟有蛟龍知

卽事

一春惟病懶門外卽天涯不信春光去空庭數落花

杏花二首

金樽檀板鬪韶華絕好穠春是酒家深巷重門人未起
 隔牆低賣一聲花

盈盈笑色晴烘日黯黯輕紅雨着烟一種嬌酣濃似酒
晚粧人倚欲風天

陸吟香

江蘇人著有窺雲閣紅餘艸

句

香滿玉樓春欲倦花明金谷雨初晴自遣

綺園小錄陸內史吟香東隣女也有窺雲閣紅餘艸自遣云云筆致絕佳

擷芳集卷之二十四

擷芳集卷之三十四目錄 才媛詩

古歙訥菴汪啟淑選

于文娥 一首

李妍 三首

顏佩芳 三首

顏畹思 三首

丁愔 六首

杜雲沚 一首

程瓊 七首

周慧貞 三首

徐元象 一首

王氏 一首

邵斯貞 三首

吳來玉 一首

程雲 一首

李貞媛 三首

劉氏 二首

王蓮雯 一首

姚莊仁 四首

殷湘英 七首

邵氏 二首

錢稚真 五首

徐暗香 三首

范齡 四首

范德 三首

吳彩霞 一首

周姑媛 五首

王瓊 五首

潘胤

潘胤

潘胤

潘胤

王

王

王

王

潘

潘

潘

潘

王

王

王

王

潘

潘

潘

潘

擷芳集卷之三十四

古歙叻菴汪啟淑選

于文娥

江西縣人詩附見於歙縣吳之駮桂留堂

詩集

題壁

廿載韶光付水流空將離恨鎖眉頭琵琶夢斷鷄鳴後
薄命紅顏哭未休

吳達菴和界牌店題壁詩序行經沂州界牌店見
題壁云云後自署西江于仲醇次女冀傳其父令
索之白楊青塚間其詞有足悲者因和之詩云西
江之水自東流多少深閨哭陌頭最惜文娥詩句

好揮毫土屋恨難休又紅顏不肯遂波流青塚何須嘆白頭荒草月明魂斷處年年歸雁唳無休方成培壘嶂樓詩話吾鄉吳耳公先輩行經沂州界牌店見有題壁詩云云後自署西江于仲醇次女冀傳語其父令索之白揚青塚間哀其詞而和之

李妍

字安侶江蘇泰興縣人靜嫻夫人之女也適解受滋著有綠窻偶存

七夕

耿耿銀河靜低徊漫倚屏人間逢七夕天上會雙星風送駟車渡雲隨鵲路停輕盈乞巧女團扇撲流螢

懷兄任荆南

三千道里各天涯夜雨寒燈憶別時重鎮遙聞征戰苦家鄉凝望雁魚遲孀親堂上思難慰弱妹閨中病不知骨肉那堪江漢阻相逢非是舊鬚眉

病中作

無力梳頭強試粧偏宜扶病檢詩囊那堪消瘦長如此清夜焚香拜藥王

顏佩芳

字芳在號柔仙浙江桐鄉縣人顏雪臞之女也適吳江周代著有偶葉草

觚賸顏芳在字柔仙桐鄉工部雪臞公女也歸我邑爛溪周氏所著有偶葉草其送春詩最佳

芳在妹宛在綺才蘭質不遜
柔仙以所適非偶抑鬱而天
樛李詩繫佩芳字芳在桐鄉人王端淑曰一氣
雄壯出人意意外而靈警之句滿幅

送春

豈是春歸候憑欄意忽離綠酣鶯語澁紅瘦蝶魂癡澹
泊無羣好幽閒與古期欠伸方欲起風雨到牕時

孝嘉姪過予併貽以詩同和

年來踪跡各西東乍見翻疑是夢中愧我能裁謝氏絮
喜君不墮庾家風千秋事業還憑立數載離情得暫同
正沸爐聲歸棹促一番聚散苦匆匆

綠牡丹次韻

掩映難分葉共稠誰將碧玉綴枝頭輕盈始信能傾國
飄泊還同欲墮樓秀色不煩螺子黛嬌容偏傍翠雲裘
此心正欲同松柏肯與鉛華作一流

顏畹思

字宛在顏芳在之妹也所適吳興某生不慧鬱
鬱而卒

觚臄顏芳在之妹宛在適吳興貴公子其性蠢
愚偏多忿忌每出則鍵宛在于深閨庭涼月皓
逕暖花芳不許一至吟玩宛在以茗中人呼之
結禱而後意不聊生惟悴經年遂至奄逝余見
其遺稿二絕句云云似此愁言讀者尙堪腸斷
况拈管之人乎
樛李詩繫畹思字宛在桐鄉人王端淑曰蒼老
靈異識度宏遠洗去近日蹊逕

題牆上薔薇

小院陰陰晝漸長一枝掩映似窺牆
窻籠白日分紅艷葉鎖青烟漾碧光
半面偶憐香自遠全身何處影能藏
誰家錦帳遮春住莫放東風逐路傍

絕句

秋入重門夜似年麝蘭香燼不成眠
梧牕坐聽瀟瀟雨挑盡殘燈獨黯然
黛痕消減兩眉峯強起臨粧意已慵
對鏡自疑非似我可能描取舊時容

丁悫

字仲蘭號蘋垞江蘇長洲縣人適金文通著有

蘋垞詩草

茅應奎絮吳美媛適金金與子屬世戚因蒙以詩并所刊集寄示予次答云空谷幽芳絕代佳蘭閨未肯讓蕭齋清音遠遞風傳韻好句皎于月入懷瑣事已全香茗播聯芳更有蕙英偕玉臺珍重推林下都講昭華少匹儕詩饒林下風氣且有師承所至其可量耶

喜四妹得遺腹子

膠絃綺閣彈來好一曲離鸞別中道
輾轉捐軀事不難懷中未茁宜男草
寢苦飲痛三旬餘皇穹錫與隨侯珠
襁褓遑論氣食牛千鈞一縷在斯須
吁嗟我妹好維護教訓成名耀宗祚
年來踪跡等晨星安得肩隨話衷悫

造謁黃野鴻師與程對雲姊姊暨黃圭尺世妹同

賦得三字

求益惟詩國來聽講二南褰帷延野趣揮麈發清談星
象光呈五鱸魚瑞應三玷居林下末幸不棄嬌憨

野鴻黃子雲詩有約因循再諸生造請三春風皆
似玉麗句出于藍洗筆憐汗袖爭鬪笑墜簪白頭
有此會杜
老未曾諳

過訪宋大家逸仙款語竟日賦謝

過盡黃梅日日佳碧梧深處款幽齋芳容隔座渾如玉
秀句盈編半寫懷燕語也隨人語密爐香直與酒香偕
綺筵展待情何厚會否桃源是舊儕

柳

十五腰肢太瘦生風前搖曳若逢迎幾行拂水疑無力
盡日含烟最有情灞岸花飛難作雪汴隄葉暗易藏鶯
征人惆悵長亭路盡把離愁付遠行

感懷

欲爲吟咏又低徊燭淚流殘一寸灰掃黛簪花無意緒
任他風月滿樓臺

簡答程對雲

幾回好句遞相傳雨散雲飛各悵然跡遠情親媿明月
清光夜夜到君前

杜雲泚

字湘若江蘇吳縣人

新月

吹盡濕雲澄夜碧看殘新月挂秋空半巖暝色依山靜

坐聽孤鴻落木中

程瓊

字飛仙號轉華又號無涯居士安徽休寧縣人

適歙縣比部吳祚榮震生生子醇五歲親授以

書卽成誦乃合諸子中語各附史事以教之醇

死不勝其痛尋亦病卒

西清散記轉華夫人卽安定君歙西豐溪吳比部之內子程恭人也名瓊字飛仙同郡休寧率溪人幼見董華亭書畫眼一編遂能捷悟及長書畫算奕無不精敏論事評理微妙獨絕其神解所徹文字象數皆塵秕也王勾詞客嘗恨情多夫人則謂自古以來有有法之天下有有情之天下唐詩云不與王侯與詞客知輕富貴重清才才之可愛甚於富貴由情之相感歡在神魂矣喜吟其句云新詩一千首古錦初下機除月與鬼神別未有人知不知天地間知者復是誰吟向無人處恐爲世所嗤古今吟不盡惆悵不同時因取中晚之詩以情役思極情放意者錄一帙曰詩以無爲有以虛爲實以假爲真每出常理之外極世間癡絕之事未妨形之于言衆轍同遵者擯落羣心不際者採擬勾新取極不嫌殊創聲到界破方信情來詩之秘也又謂寫之手馥皆有烟香著其氣息卽時便醉其論禪則言自古名流樂佛智之雄誕無非因其巧鎔惡見耳嘆世人批書非吟藝則隔搔卽實華知耐菴未至錢塘三婦知開闢數千年始有牡

丹亭顧其所批略於左繡試味玉茗通仙鐵笛
 海雲孤一絕應思寓言既多暗意不少須教節
 節靈通自批一本出文長季重眉公知解之外
 題日繡牡丹雨冷香温爛然成帙毫分五色肌
 孽理分大槩照依原本將驚夢折蟾宮折桂崔
 徽期約等俗字刪去六十餘字然後言杜麗之
 人形至瓌秀心至纏綿眼至高遠智至強明志
 至堅定習聞強鳳歸鴉已有內決於心不服賢
 文之意休道暗隨幽媾折莫不是人家彩鳳暗
 隨鴉一句固已明明註出不容等閒藉口其云
 但思莫負者母本懷者鳳而遷就者鴉也有此
 僥倖者得夢中之鳳已足於博地之鴉無羨也
 願都是咱者寧與夢中之鳳偕死不與博地之
 輩俱生也藉令夢嫁非偶神魂亦必不從况乎
 一例恒流肯擬將身拚與正以人生至黷難緩
 而不可再之事焉忍付之異類幽情誰見猶云
 紅絲繫後死生休將佳人見耶不佳人見耶佳
 人難得不佳人則化石人間莫為女矣好無人
 見謂懷而幽怨之人非謂人非人輩夢想誰邊
 先以已身化為阿堵種種形好視悉端正也固

非綠綺幽絃芳年越禮黃花妙句晚景貽譏者
 所得擬焉若乃息媯無言樂昌啼笑是何說與
 又作者嘗言文章妙處皆在紋縵間察其闕振
 之處玉茗以為才貌絕世之夫應配才貌絕世
 之婦誰不謂然然春腸遙斷不問其他而茫茫
 天涯才貌絕世之婦不得而知也往往隨一例
 名門以去耳暗隨者又以鴉承乏焉尤極慘已
 必如杜氏持之以志召之以夢懷之以死覓之
 以魂庶兩美其必合矣春卿一生最有造化以
 貌則有水鏡之麗娘以才又有碧眼之苗老人
 所得一已足者彼乃雙擅焉殆亦幻戲所有而
 實境所無我佳人可以無嘆也木為生意人貴
 青春是矣何獨取於柳乎柳枝何詠乎爾曰柳
 也者天地之柔情也忽眠忽起最善抽思縱遠
 飄空一根萬緒化為飛絮尚徧房櫳者也真才
 子也吾獨以為但實其節亦可變梢雲之竹知
 歛其氣亦可以變歲寒之松也春卿之志誠是
 也梅奚取曰雨肥紅綻汗潮微酸笑笑美懷風
 風潤粉舉似香肌無能踰此芙蓉至艷當彼霞
 裳耳木之正氣春之正態也既尊梅矣又統領

以牡丹何也梅非肯隸牡丹者也既貪冷秀孤
芳又認嬌紅姹紫情不已雜乎牡丹又奚取諸
曰身樹出於內典牡丹摘自西廂屬肝魂事故
有花神生之理也識神入胎仙聖由此實造物
者之毒人非伉儷者之鱗教也若無牡丹則無
梅柳也况用情于梅柳也玉勾詞客曰么荷其
舊譜也既已得花三昧起色勝解將愛水根作
香世界則烟絲醉軟荒草成窠蝴蝶門安斷紅
逕接欺人不解誘蠹思春犬腹羊脰如遊園觀
彼但棲神一處觸眼嘲吟寧復顧性海歸香鮮
花供佛哉復謂微塵妙色現廣博圓滿之身晉
代宮妝有衛種長白之嗜鬢持天地亦若生酥
人趣偏佳莫先形肉無奈莊姜死後風人殉之
此後才人但寫形肉無不呆純者脂著兩玉生
烟寫肉鮮奇自玉茗始始蝴蝶門牡丹亭寫形巧
麗亦自玉茗始古則枚皐嫚賦魏世笑書今則
用修鸚嘗美門情外决不能含花衣粉版甜口
咋人弄影簾中溜音紗外鶯圓燕剪繪狀圖聲
而別有輕筆淺墨可以粉碎丁香雙描夢影其
自號為無涯浪士有憶情生豈不以理之所必

無情之所必有也袁中郎云好好色不真者其
惡惡臭必偽玉茗詩但念中郎思欲飛佳人遲
暮難重會亦急索解人之意夫轉華之批則多
取成句代已意出奇無窮而轉語掀翻大藏蓋
不僅從世間文字來也有小印曰大心眾生嘗
手轉華嚴見梵圖所誌有人轉華嚴經以洗手
水滴蟻子蟻即命終生天又曹溪偈心悟轉法
華因別號轉華人遂稱以轉華夫人口熟揚升
菴廿一史彈詞綠窻紅燭之下輒按拍歌之自
書名句為憲聯云綠窻明月在青史古人空感
慨間生救以歡喜及歿玉勾詞客觸事嘆曰庸
妻俗妾妨人志節然後知鮑姑之可愛也庸妻
俗妾妨人修道然後知鮑姑之可愛也每念韋
蘇州性懶不及私百事委令才沉沉積素抱婉
婉屬之子之詩遂永虛主孟之位焉吳二十名
震生字祚榮更字彌俄號弱翁至是自號為鰥
云

題彭祖張蒼像

苦惜年光戀幻身白頭私擅夢邊春兒家酬酒淒然問
可有齊眉耦齒人

集古今宮闈德容兼備者若干人題其上

艷淑如斯例作塵相逢可卽昔時人願將彼骨吹成土
持葬兒今屢轉身

釋牡丹亭傳奇色情難壞意

何自有情因色有何緣造色爲情生如環情色成千古
艷艷熒熒畫不成

有疾豫別玉勾詞客

風流嘉慶古難均共命同心異別親應恨塊泥將打破

誰能再塑管夫人

卧病坐樂軒

日日熏香禮覺王不任操作不縫裳誰知鹿苑無生訣
未及龍宮不死方

疾作夢母氏孫淑人挈兒來茲不復夢矣

爲痛寧馨轉自傷相隨却恨我無娘更誰看等千金重
只我佳人斷繡腸

屬玉勾生柳外題小眠齋三字

千春萬載此沉埋坐樂軒中只暫挨豈可便無題額處
相煩親署小眠齋

西清散記玉勾詞客欲迎塞外姬轉華夫人吟唐
實君賀宋侍御詩從今願學壽陽妝細勾不蹴湘
裙幅以促之將買小侍兒曰卿亦聞朝雲十二事
坡公耶轉華以碧玉小家待年則緩勤求舊族稱
中婦嘗有竹夫人詩勗人妻又為湯婆子詩訓人
妾云君不嗔貧不妒色熱腸偏愛伴人寒眷屬中
稱如意果無情翻作有情看玉勾詞客笑曰古今
賢婦人所難平者妒也君悉平乎轉華夫人曰如
者亡國敗家之本也夫則愧憤以滋疾妾則鬱憂
以天年計已之私而不欲蕃人之嗣雖有百美莫
償一醜何為能賢夫富貴貧賤強弱智愚天之道
平也而不平莫甚於人之心貧者妒富賤者妒貴
弱妒強而愚妒智卒不能違乎天名既毀而實亦
喪焉善妒者適自病也轉華夫人深味禪說謂如
來往世時無非為無情眾生說有情法耳世人以
貪嗔癡為有情高者學佛而著於佛學仙而避於
仙猶之貪與癡也有堤上感懷詩云花飛不哭哭
開前無始空花盡可憐為眷春光也怡逸淚江香
海有情天輯古宮閨德容雙備者如干人而嘆曰
人猶花也才情則香也花生香在花死香亡花除

歸土花業難除香滅歸空香性難滅今花即古花
之魄今香即古香之魂耶賦詩云云玉勾詞客詩
悟得色空枯木似百千億色奈吾何蓋詠澡盆也
轉華夫人因以四句釋牡丹亭傳奇色情難壞之
意云

周慧貞

字挹芬江蘇吳江縣人周文亨女善丹青適嘉
興縣孝廉黃婷早歿著有剩玉篇

吳江縣志周慧貞字挹芬尚書周用之裔適嘉
興黃某善畫工詩其稿沈宜修為序
構李詩繫慧貞字挹芬吳江人嘉興孝廉黃婷
之室早歿沈宛君為之作傳王端淑曰挹芬與
孟晚柔嘉鼎足三分為一時之勝

對鏡

拂鏡試新粧無言暗自傷但看花上露愁斷九迴腸
無限傷心事朝來一照中自憐顏色減不似舊時紅

七夕

雙星暗度巧雲飛玉漏聲殘月正西秋思不堪凝獨立
數竿風竹小窗低

圖繪寶鑑周慧貞字挹芬吳江人適嘉興黃姓病
久經年對鏡長嘆有詩云云挹芬與孟晚柔嘉鼎
足三分爲一時之勝善畫工
詩風度洒然惜年不永耳

徐元象

字奇孺湖北廣濟縣人孝廉張楚偉之室也

送外

送君入楚江悠悠歸路長一去隔千里魂夢伴瀟湘

居易錄女郎徐元象字奇孺黃州廣濟人舉人張
楚偉字小損配詩文有雋才其京口寄父書云兒
自襁褓未離掌膝江頭道別意緒淒然舟行風水
便利遂達京口江南佳麗過眼成塵廣谷大川靡
能記憶舅氏出鮑明遠六雷岸與妹書與兒讀之
如賦如頌蓬窗瑣瑣恨不能竟所思官舍清華几
案如滌挑燈夜坐日起奉甘旨晨昏戀切切耳阿
母阿翁無恙四時之序成功者退山林觴咏幽情
暢遂何必紆拖青紫乃稱
貴乎又送外絕句云云

王氏

浙江嘉興縣人

橋李詩繫王氏嘉興人王端淑曰鬆雋不凡可
與言詩

春日

畫長門靜掩愁病自應憐倦繡頻餘錦焚香數熱錢護
花嫌蝶舞聞柳愛鶯眠偶到樓頭望春光半已還

邵斯貞

字靜嫻浙江餘杭縣人陸進思之繼室也詩見

西湖竹枝詞續集

西湖竹枝詞續集邵斯貞字靜嫻餘杭人陸進思繼室也

題二分明月女子集

懸想風流質翻疑畫未真簪花臨曉鏡調粉滴羅巾腸
斷秦樓集詩傳渭水濱香名誰比似洛浦結芳鄰

西湖竹枝詞

錦帶橋邊荷芰香東鄰女兒昨催粧凌晨棹船採花去
生怕前頭逢玉郎

未到清明土鮒肥寺前新釀白薔薇買得酒來魚正熟
月到湖心蕩槳歸

吳來玉

字清映江蘇常熟縣人

題畫梅

一尺溪橋凍不開朔風何處雪紛紛江南春色枝頭見
不向邊城笛裏聞

圖繪寶鑑吳來玉字清映未詳所適姿才穎敏能詩畫善音律書小楷其畫梅并題云云

程雲

字岑度安徽歙縣人吳丹步之室也

池上賞荷次外韻

池水碧參差池花紅爛漫綠葉何亭亭臨風吹不亂寄語打鴨兒莫打鴛鴦散

李貞媛

字椒雲浙江平湖縣人庠生李耕烟女也適陸南香著有凝香閣集

香雪蘭

淡白開炎日幽芳愜素心綉堪分玉珮香欲上瑤簪入

夜銀蟾映臨風翠帶侵粧臺休浪折爲爾費閒吟

菊江晚眺

一幅丹青入望中着霜楓樹點輕紅平江鴈寫行行字隔浦帆飛葉葉風黯淡纖雲斜落照微茫寒月挂疎桐詩人莫倚秋光好蕭颯商飈萬木空

夏日

臨水高樓菡萏香閒看池畔浴鴛鴦深閨盡日無人到風過松梢拂面涼

劉氏

湖南攸縣人詩見國朝詩選

無題

殘風殘雨總關情一曲平沙調不成鏡有明心同色笑
鴈無人字只聞聲良宵月仗清樽貯瘦骨衣圖白紵輕
莫賦湘靈思太切一泓烟水淚千泓
徒愛名花氣不羣難將心事托行雲魂當悲後銷何極
語次歡前俗亦文薄命有誰知瘦影黃昏無計挽斜曛
遙憐歲歲湖山畔故寫湖山意問君

王蓮雯

江蘇常熟縣人

午日

紅顏薄命一身孤節屆端陽事事無倦倚闌干吟不就
閒將盂水灌菖蒲

姚莊仁

號靜巖初名靜仁江蘇嘉定縣人姚天衢之女
適嘉興縣丙辰舉人直隸雄縣知縣汪鉞

秋夜話別贈諸姊妹

一夜西風惡天邊雁失羣話長燈易剪情密袂難分衰
柳何堪折寒砧不忍聞勞勞亭畔路落葉正紛紛

次外寄懷原韻

月皎雲屏夜蟲吟幾處秋羞歌子夜曲懶整玉搔頭露

滴蓮房冷江空菰米浮離情知萬斛都付一扁舟

彈琴和韻

為愛琴心愜素心怡情更喜遇知音徐調玉軫香籠袖
漫整冰絃月掛林籟盡頻將消寂寞窗虛常自伴哦吟
深闈几席無塵到只合嵐光水色侵

夏柳次韻

濃陰滿徑繞晴絲飛絮池塘動遠思羌笛一聲今古怨
鶯梭幾度往來馳弱依芳草青青日舞向薰風習習時
彭澤賦歸北牕卧奇峯遙映最多姿

殷湘英

字雲和里次未悉

孫貞媛詩 有序

名花傾國並洽歡情香草美人競抒哀怨孫氏
仙姬詩傳有美畢揚靡幽弗闡茲得咏物數章
匪炫芳華特標貞潔庶使青樓紅粉勿汚仙姿
緣知素服黃冠自饒花態詞多未備詎屢史臣
采葺之心意在相關竊慕風人比興之例陋深
閨之寡識恐大雅以貽譏別有珠璣用光典籍
自慚瓦礫
敢附棗梨

幽蘭娟好影翩翩絕似貞姬弱可憐水漲洧濱誰與摘
根離湘浦幾回遷光風轉處名堪溯春圃銷時恨未捐
紉珮自饒芳竟體步虛迎得藥珠仙

朱門富貴幾家傳簾捲芳殘怎久妍蓬島飛花終夢幻

驪山銜鹿忽烽烟神依北勝家何在腸斷東風命不延
國色天香猶縹渺金裙玉珮伴神仙

梅花嶺上墓嬋娟便比梅花亦宛然徧歷嚴寒成冷艷
獨將芳潔馱塵緣烟鬟豈入羅浮夢冰骨何慚姑射仙
零落春風倍惆悵招魂須向月明天

狼藉梨花帶雨鮮玉容憔悴並堪憐謝娘歌好終爲妓
楊氏魂銷未必仙巢毀烏衣留弱羽香含白雪殞芳年
遊人寒食隋隄路誰弔雲卿訪墓田

丰姿出水自天然濁淖寧污九品蓮雨打紅欵花冉冉
風翻綠敗葉田田鴛鴦孤宿難成夢翡翠驚飛已化仙

可嘆芳華易搖落空江一片鎖秋烟

桂花攀處月輪圓紫府飛昇有夙緣雲路飄香離俗染
天涯落魄憶當年何須玉斧愁人斫底許霓裳跨鶴旋
翻笑姮娥因竊藥至今稱作廣寒仙

次韻題明妃圖

一女此離苦思稠笙歌依舊漢宮秋當時雖殺毛延壽
未必君心記隴頭

邵氏

江蘇青浦縣人邵成正進士之女也適汪烈

題西湖春泛圖

斷腸風信今番幾吹得新潮分外青好放木蘭艇子去
春光容易過西冷

桃花如雨柳如烟點染西湖亦可憐屈指春光但九十
吳綾一幅記年年

峭厓雜錄好雲易散自古傷之予室邵氏爲植庭
先生女戚里有針神之譽已卯二月作西湖春泛
圖工雅不減元人自題二絕云
云不逾月而卒前詩殆其讖歟

錢稚真

字西畹浙江海寧州人也

題山莊雪霽圖

玉龍戰罷堆鱗甲茅屋蕭蕭縹渺中山是晚來分嶺白

日從曉上透林紅應知倒竹垂將起料得飛鴻踏漸空
寄語隔溪扶杖客不須鶴氅禦寒風

山意

襟懷每與世相違幽谷雲深蕨正肥猿若聽呼堪作婢
竹當可結便爲屏飢充一鉢松花飯寒著千針荷葉衣
年去年來無歷日梅花綻玉識春歸

分竹

茅齋添得綠陰勻開徑他年亦有因日暮倚來情似舊
月明疎處影偏新乍移幾度憐晴雨深愛終朝作比隣
養就龍雛見高節饒涎太守忍清貧

夜讀

抽得牙籤却起更離騷纜罷又陳情隣將杼軸爲酬和
婢解丹黃亦友生冷靜倍堪尋意味辛勤端不望功名
秋聲賦裏歐陽子一片冰心對月明

鴈字

迢遞關山宿水滸乘風斜掠掃千軍修文有路排青漢
潑墨無箋借白雲蝸篆成書難竊比鴉飛撲雪豈同羣
菰蘆冷落秋濤裏待汝歸來寫八分

徐暗香

字晚蘭江西南昌縣人

重陽

又是黃花節江城樹樹秋鴈迷雲外路烟鎖夕陽舟夜
月鳴雙杵高風感敝裘閨中殊寂寞閒理玉搔頭
江渚芙蓉老高天白鴈飛風霜凋玉樹南北寄征衣把
酒酬籬菊登高望落暉淵明三徑好閒坐欲忘機

寒食

輕寒依舊逼窻紗清曉焚芸漱紫芽三月鶯花寒食老
五更風雨夢魂賒青烟初賜宮中火綠柳頻栽處士家
却恐春光歸去早柴扉深鎖碧桃花

范齡

字柏年江蘇吳縣人監生范志長女著有芳洲

吟草

蟬

出本隨時化高應得氣虛賞音誰合調寄跡自清疎芳
樹綠無際夕陽紅有餘孤吟聲太冷斷續正愁余

紫藤架

古藤結層陰紫綬垂若若好風池上來餘香帶花落

山樓晚望

幾家茅屋疎林外一徑幽花落日閒野老不知身入畫
踏殘黃葉下秋山

樵

荷擔行歌度嶺遲閒情祇有白雲知仙家時日原非永
柯爛纔消一局棋

范德

字恕成范志次女適候補主簿戴師點著有蓉
洲詩草

寄京兆大表姊時隨任永春

美人隔層雲三載傷契闊道里且悠長何以慰飢渴淒
涼舊游處秋風暮蕭瑟采采幽蘭花孤吟望天末

小圃初晴同芳洲姊賦得家字

薄晴景物晚猶賒
逕曲溪迴勝若耶
繞屐暗芳時引步
受風輕燕各尋家
綠楊枝上三分月
流水聲中幾片花
上巳乍逢春正好
莫因修禊惜年華

晚步小園

遙峯翠潤初消雪
綺陌烟輕半入雲
月在梅梢風在柳
可憐春色已三分

吳彩霞

江蘇無錫縣人

贈周寶鐙

多生定擬蕊珠仙
此日風流更宛然
幾見名姬爲紫玉

欣逢佳偶卽青蓮
香心似雪姿尤麗
秀句驚人骨亦妍
最喜麟兒拋棗栗
書聲共映綠窻前

徐鉉本事詩註梁溪吳彩霞有贈寶鐙詩云云

周姑媛

字室楨廣東海陽縣人也

春陰

刺繡坐深堂
春陰日正長
梨花猶夢雨
蛺蝶半迷香
繞戶晴烟薄
開簾晚吹涼
芳菲零落盡
荷葉滿池塘

夜雨

牀頭聽夜雨
細數不知休
洗盡千山色
難教洗舊愁

夏日

茶竈正飛烟棋聲驚晝眠日長無意緒傍水弄荷錢

春水

碧波新漲大江頭兩兩浮鷗傍客舟妾意亦如江上水

紅塵不染白東流

梅花

冰肌玉骨絕無瑕清韻天然如麗華一丈粉牆遮不定

侍兒偷折比隣花

王瓊

江蘇丹徒縣人著有愛蘭書屋初刻

趙帥愛蘭書屋初刻序王生柳邨以其女弟碧雲所著詩若干首質余初覽之疑其為柳邨詩也柳邨七古學太白七律學高岑五古律五七絕學右丞龍標襄陽太祝諸公幾乎升其堂矣但閒澹多而天籟少碧雲如鳥語亂殘夢花深有鶴眠蕉雨亂鳴琴芳草到殘春寒氣侵人骨梅花獨吐香悵望日已莫長隄上晚烟鳥語半江春春烟生林末等語又如江上斜陽唱麥雞且剪芭蕉學晉書愁絕乃西風細雨天等句皆天機所到非柳邨所能為乃今而信為碧雲之詩非柳邨詩也余甚樂為之序且贈之詩云問年纔十五詩藉柳邨名鮑氏難為妹謝家亦有兄庭鹽空自撒香茗幾時成海內論閨秀從知小字瓊

北窗

幽棲每適情心不沾塵俗林間聽鳥鳴池畔看鷗浴一榻茶香清半窓春睡足笛聲何處來清韻斷還續

大兄命號蘆中人余嘉其取意之高爲作十韻
踪跡匿江濱浮生原是寄目覽千卷書未嘗識一字自
覺胸次寬全無俗物累俯仰蘆葦間秋來白露墜把酒
看金焦在山不在醉浩浩江波流瑟瑟江風吹對此無
盡期復有不窮意亦與人境通近人人自避盈盈一水
間不聞車騎至此中慣倨侮何從知諂媚

園後

塵氛都卻盡清興獨悠然徑僻無人到花深有鶴眠孤
吟流水岸兀坐夕陽天活潑池魚躍生機竹放鞭

春雨和劔南韻

春陰漠漠暗紋紗小雨如酥兆歲華細草滋根沿砌綠
幽蘭津蕊傍岩花鳩鳴滑滑催題句泉漱涓涓待試茶
新沐遠山顛米畫濕烟凝處有人家

虎邱

海湧高高秀絕倫五湖烟水望中新蓮花池畔清思杳
白璧無雙似美人

頤芳集卷之三十五目錄

才媛詩

古歛訥菴汪啟淑選

孫婉蘭 三首

吳舳 四首

李琇珮 一首

王煒 八首

劉靜筠 一首

黃瓊瑤 二首

彭琬 一首

彭琰 四首

潘素春 一首

朱錦裳 二首

黃氏 四首

黃氏 一首

馮履端 一首

趙承光 七首

藍燕 一首

余兆儀 五首

譚素 一首

胡惟寧 三首

馬士琪 八首

何氏 一首

鍾若玉 七首

姚泖 五首

孔素瑛 六首

萬氏 一首

吳蕙貞二首

沈氏一首

擷芳集卷之三十五

古歙詔菴汪啟淑選

孫晚蘭

號愛蘭主人浙江石門縣人適嘉善縣孝廉陳

秉元晚蘭早沒秉元編其詩曰飲恨吟

曹復元飲恨吟序愛蘭主人生長高門素工柔翰其尊人詔庵先生往在都下與把臂論心如坐春風中旋以名進士教授嚴陵聲藉甚愛蘭主人胚胎前光以故香生繡闥湧雲驅濤非其得諸家庭之訓益者深歟年十八歸穎川陳生其家稔知其事翁姑相夫子以逮族黨與臧獲真宜家賢淑人也今年春以宿疾竟致不起尊坡抱奉倩之痛不忍湮沒其生平因刪存其律絕詩為一卷付之梨棗中多清麗之章其和新

隔簾吟絮者專美于前也
陳秉元悼亡詩一病纏綿心轉清忍看命盡怯
初更年來辛苦人爭說那得償卿廿載情閒來
餘事是微陰每到陰成百慮侵含淚讀君腸斷
句紅樓何處覓知音愁絕春殘二月中空于遺
挂識春風新來老僕當年婢哭汝何堪淚也紅
終須零落共山邱其奈鯨魚此尚留若使夜臺
嗟寂寞不妨
從爾話離愁

冬夜憶筠溪弟

冬來苦晝短夜漏恰偏長
旋訝寒侵骨還憐月繞廊
檢書破岑寂顧影起徬徨
憶汝千山外無從寄一行

雨夜不寐

銀缸閃爍獨低徊
心緒年來強半灰
三徑有花判夜雨

五更無夢聽春雷
賦情寧許魚龍混
多病何堪燕雀猜
輾轉旋看牕送曙
思量懷抱幾時開

春盡

風急雲昏雨似絲
銷魂最是綠肥時
可憐春去憑誰挽
靜對花飛有所思

吳 肫

字凝真號水蟾子江蘇華亭縣人適浙江嘉善
縣曹允明七歲能讀書長而端靜敏慧女工之
隙靡不綜覽雖當操作未嘗釋卷相夫事姑內
外咸稱其賢不以吟咏而妨所為詩詞皆工允

明居半畝構小西閣梅花繞屋與水蟾嘯咏其
間尤善繪事烟雲花鳥筆墨生趣人爭寶之福
清魏惟度新城王西樵皆不遠千里郵乞其詩
詞有桓少君之風嗣子十經文學婦李玉燕俱
能詩一門相繼可稱盛事著有忘憂草採石篇
風蘭獨嘯三集

橋李詩繫吳肫號水蟾子華亭人適嘉善曹允
明王端淑曰詩多古意矯矯如千丈松

眺野

秋光瀟灑散平湖白水明沙混玉鳧近渚風生殘芰落
遠山流翠碧雲孤籠將物色供憑眺好拾蒼茫入畫圖

夕照漸低村樹隱銀蟾一點漏疎梧

艷曲二首

金屋暖長春蘭階人似月但願如月圓不願如月缺
贈妾紫金環遺郎白玉玦郎恩環不解妾心玉比潔

採蓮曲

弱柳繫游驄叢花映嬌面郎珮紫紋囊儂從扇底見

李琇珮

浙江會稽縣人張某室也詩見潮州府志

弔陳貞女墓

有序

處女陳瑞娘鸞友未交夜臺同赴至奔喪而後
死允矣從容惟從一以捐生休哉慷慨妾隨任

抵潮聞而驚歎因托管城以弔貞魂詩成
使小鬟持挂墓門以作丹黃之奠云爾

泉臺方合瘞夫壻昧平生不管生前事焉知死後名鴛

游歡漲水鴈斷泣殘更葬湖山鴈塔石下墓面西湖余本柔姿者一

言慰九京

王 焯

字功史又字辰若江蘇太倉州人太原相國之

裔善畫適海鹽陳文學光緯著有燕譽樓稿

橋李詩繫王焯字功史又字辰若太倉人太原相國之裔海鹽陳文學光緯室能詩善畫有燕譽樓稿與卞夫人為師弟交得其清秀蒼韻之傳有林下風以世亂偕隱于婁博學敦古詩多名句顧伊人稱為笄幃中道學宿儒不當以香奩日之如月光臨水淨雲氣近山多開簾納新

燕移榻近高柯皆佳句也太倉女子黃若從父蜀歸以奇花珍木圖示之日夕模寫致病而死

題介碗陸夫人畫竹卷

自昔管仲姬抽毫染修竹娟娟綺石傍琅玕照人目獨
屬閨閣才胸中少林麓只今介碗氏潑墨較純熟生綃
百尺強渭川千畝簇初苞間枯梢暮雨秋烟綠筆牀螺
黛殷玲瓏憂寒玉潛招湘女魂碧牕伴幽獨

冬日林居

颯颯微風雪長林鎖白雲曳羅山骨迥汲澗水衣分樹
老花猶在霜清鴈不羣誰憐搗衣者此夕幾回聞

春日閒居

南郊春色滿人靜鳥聲多久雨魚苗活微風燕子過花
飛寒食節草綠夕陽坡盡日無他事援琴對薜蘿

感懷二首

遠離阿母四年餘百疊愁眉更不舒眷戀庭闈惟有夢
播遷南北未成居家園風景三更月夫婿生涯數卷書
無限傷心歸未得鷓鴣典酒對相如

空傳錦字有才名淚雨春來似未晴倭墮睡殘悲數病
屢屢炊盡送遐征心隨吳水鄉關去愁逐春雲晝夜生
潦倒三遷名未就誰憐女子賦離情

鄉思

不禁鄉思倚危樓山色空濛海氣浮風雨別來花半老
音書隔絕鴈經秋林間野鶴呼幽夢天際浮雲帶遠愁
好寄相思與婁水門前日日有潮頭

西泠閒詠

澄江迴抱古城斜一片烟雲接永嘉爲愛好山聊駐足
偶依高樹便成家湖光潏灩侵行笈竹影參差帶落花
聞道故人將卜隱短衣雙挽鹿門車

春曉

鞦韆庭院落花紅午夜香消逐曉風殘月半簾人未起
數聲燕語夢魂中

劉靜筠

字素嘉詩見倚雲樓集

苦雨寄江夫人蘭

連日瀟瀟雨林花豈日宜妾慚無好句姊必有佳詩拈

繡慵開帙臨粧懶畫眉寄言江彩筆和就給廬兒

閨秀江蘭和韻答劉夫人苦雨詩風雨連朝發敲
枰酌酒宜池深難問渡屋漏勉裁詩石丈垂滂淚
花妃損黛眉香奩來
好句急取付歌兒

黃瓊瑤

字芳珮所適未詳

孫貞媛詩

我慕貞姬潔焚香讀簡編懷清冰雪淨抱節瑾瑜堅恥
作章臺侶真成閨苑仙恍疑明月夜環珮玉階前

次韻題明妃圖

龍堆彌望陣雲稠塞外嬌軀却怕秋憔悴自憐歌舞倦
烏孫偏賜錦纏頭

彭琬

字玉映浙江海鹽縣人進士彭期生之妹浙江
總兵馬孟驊之媳與妹幼玉並擅名譽人稱雙
璧著有蘿月軒集

攜李詩繫琬字玉映海鹽人進士期生妹浙江
總兵馬孟驊媳與妹琬稱雙璧王端淑曰琬詩

巧慧俊冷不
作淺浮小語

懷王辰若夫人

湖上烟生碧樹枝柴扉晝掩落花時何當得覩雙星貌
空羨擎來道韞詩曲逕茶香留夜月朱欄鳥下看圍棋
三春風雨愁深淺病骨支離無限思

彭琰

字幼玉號琬姝彭琬之妹也適文學朱化鵬著

有遺集一卷

陳維崧婦人集海昌彭幼玉進士孫適從婦也
遺集一卷最新警王十一會以小蜜花箋書其
銀河吹笙一詩詩云銀河吹徹玉笙遲清滿迢
迢離覺時巫峽雲歸俱是夢鮫人淚滴盡成絲

霜衾抱月羞孤影露葉驚風別故枝偶遺記末
二句幽思怨緒故自使人不能終曲也
橋李詩繫彭琬字幼玉琬姝適文學朱化鵬詩
不多見而名句絡繹王端淑稱其才情兩足似
勝姊氏姊惟幽艷姝
則英特而博大矣

懷王辰若夫人

碧草萋迷接柳枝匆匆良晤夕陽時纖眉畫就春山色
素紙裁成白雪詩風送花香沾去袂鳥啼竹徑冷殘棋
歸來靜掩閑庭月欲向清光寄所思

病春

半簾垂柳夕陽斜香冷閑窗日便賒莫道朝來不憔悴
撩人偏恨牡丹花

揚子集
卷三五
八九日

鳴蟬無語戀寒枝正是登高病起時
忙裏不知秋色老
青山紅樹夕陽垂

佳節徒增寥落心
秋空無雨晝陰陰
年華不似愁依舊
寂寂幽庭聽遠砧

潘素春

江蘇上海縣沈沙港漁婦也

雜感

簾外輕寒逗曉風
柳枝無力漾晴空
墮樓魂返珠還綠
記曲人遙豆不紅
夜半臙脂收塞北
春深銅雀鎖江東

自知不是鴛鴦侶
漫訴愁腸託遠鴻

朱錦裳

字梭雲里次無考

孫貞媛詩

遙識淮南有淑姬
中閨細咏表貞詩
家逢兵革都傾覆
路歷關山總嶮巇
梅潔獨先春曉謝
松高偏迄歲寒知
粧臺未讀曹娥碣
弄筆難成絕妙辭

次韻題明妃圖

漢宮離別怨何稠
一曲琵琶萬里秋
可嘆芳容真絕世
紫臺人去不回頭

黃人氏

號浣月安徽休寧縣人也所適未詳著有噴香

閣稿

黃婧噴香閣稿跋妹弟浣月稟性幽閒直姿穎
悟弱齡咕嗶長夜呬唔柳絮芳吟名久傳于繡
閣椒花美頌價頓長于香奩人稱灌灌佳人自
信翩翩雅士想其思致依稀風定香微緬彼情
閑彷彿月
明人靜

同綠牕女史南樓坐雨

促膝憑欄坐蒼茫雨一樓四圍山霧合幾片野烟浮樹
色添新翠溪聲改舊流黯然岑寂况相對不勝愁

與諸隣女遊春分韻得東字

春晴約伴過溪東流水橫橋一徑通柳眼多情窺鬢綠
花顏着意向人紅鶯聲歷亂啼閑日燕尾高低掠好風
對景分題爭絕句豪吟翻笑屬閨中

采桑謠

桑葉雨澆肥提筐出繡閣采罷急歸來忘却金釵落

新夏

楊花落盡草初肥為愛清和試夾衣燕啄新泥營舊壘
雙雙飛去復飛歸

黃氏

號德容浣月之女弟也所適不詳

題噴香閣稿

繡閣餘閒及簡編筆垂秋露墨成烟薔薇浣罷焚香誦
不愧閨中李謫仙

馮履端

字正則江蘇南匯縣人丁岫瞻之室也

南湖別業呈夫子

小築幽深一水湄青畦碧樹望參差新豐雞犬頻來往
香茗文章舊倡隨嬌女摘花晨露濕奚童驅犢夕陽遲
先生倘欲逃空谷冀缺餘風尚可思

趙承光

字希孟浙江錢塘縣人湖南按察雲岑先生第
五女也按察有六女幼承庭訓自課詩書承光
儀度克端善於應對適語水朱公子喬三人稱
佳偶著有遠樓稿

題來仙樓

高樓山半景悠然俗慮全消意若仙遙望晴巒橫遠黛
坐凭雲樹半參天臨牕燈火欺新月別浦漁舟泊晚烟
獨倚偏驚秋氣早一時清興欲逃禪

同姪女望月

桂花香滿小山莊揮塵論文待月光庭葉經風隨意落

蛩聲入夜若爲忙滄洲遠結雲書阻松菊空存帶草長
富貴清閒兩相負晚臨青鏡鬢添霜

同外題濟南文署燕室

雙飛何必羨分茅官舍清清構小巢漫憶驚濤曾閱歷
且將險韻共推敲梅花乍落蜂黃褪柳葉方舒燕羽交
稚子若能成素志他年偕隱碧山坳

虎邱竹枝詞四首

春來事事漸繁華殿閣雲深萬樹花鶴澗香生羅綺簇
引人不獨只烟霞

薰風池閣綠陰中隔斷塵囂逸興濃茉莉珠蘭香徑曲

滌煩時送一聲鐘

桂子紛紛午夜幽可中亭上月當頭楓欹澗道如微醉
點綴秋光映碧流

短薄祠前雪漸鋪林巒粉飾畫難圖梅枝相映山塘月
一抹寒烟共太湖

藍燕

詩見茅應奎絮吳羹

閨怨

限溪西雞齊啼韻及一二三四五六七八九十百千萬雙半寸尺丈

六七鴛鴦戲一溪愁人二十四橋西半生書斷三秋雁
萬里心懸五夜雞蠶作百千絲已盡烏生八九子初齊

丈人何處聽鳴瑟尺寸長垂雙玉啼

余兆儀

字相龐安徽含山縣人適夏韻軒著有詩集

清詩備采余相龐余安人世居含山運漕鎮為吾邑夏君韻軒之淑配夏子治廷暨弟錫五之令慈也韻軒里稱長者相龐如賓相敬有梁孟風中饋餘閒輒拈吟咏持家訓子範重鄉閭

偶咏

粗識聖賢字名書看幾家破愁憑竹葉卜喜問燈花秋氣摧風景霜威逼歲華慇懃訓兒輩耕視是生涯

讀岳武穆精忠傳

戎馬生郊不鑒忠僅留餘喘駐江東父兄恥辱千秋恨

將帥勤勞一旦空命絕風波啼杜宇獄分星斗嘆征鴻棲霞嶺上魂猶在可捲螺絲巷裏風

夜坐示兒輩

竹月當牕坐偶談細思家道淚先含情傷爾父雙眸青事在吾兒一臂擔攻業九須熊膽苦讀書味本蔗漿甘昇平歲月難輕得莫面墻陰愧二南

夜過漕溪

朔風吹雪白平野連天濶回首瞻白雲孀親隔林末

舟泊鳩茲就醫

篷窗遠眺江干雪舟次閒看卷裏詩得謝塵勞遑問病

忘機是藥不須醫

譚素

詩見谷音傳響

次韻題明如圖

天山水雪晚來稠
手執絲韁兩鬢秋
一去紫臺魂杳杳
芳名猶記舊村頭

胡惟寧

字一軒江蘇江都縣人

對梅二首

問春庭下日遲遲
始見林端綴數枝
莫笑孤芳開太晚

江南風雪不同時

林逋當日種湖干
倚檻高吟興不闌
我亦心期冰雪老
世人多就牡丹看

月下同妹惟貞看菊

每到秋來對菊叢
東籬尚想晉時風
數枝清艷經霜後
連袂相看月影中

馬士琪

字韞雪河南祥符縣人
適四川晉城張應垣著
有燼餘草四卷

河南通志張應垣妻馬氏祥符人
早孀親授二子經書長新廩膳生次寧舉人有母弟為滕縣

令觸時網將罹不測馬盡賣居宅以脫之生平喜讀書自少至老不少輟著有燼餘詩草行世新妻胡氏事

姑以孝聞

方仰松壘嶂樓詩話燼餘詩草識見高老風骨沉雄不獨巾幗中無其人即當時以詩名世臻此境者亦不能多實在綠淨老人蠹牕老人之上其餘脂粉之流益不足道者矣

天竺寺

三竺深始佳妙香靜空谷無量人天供至此心神肅在昔聞兵火茲山未沉陸若非龍象力何以感羣族出門望層巒回向古道場雲日遞隱見巖壑易陰陽別院通危橋澗曲聲琅琅萬木擁寒閣千燈照迴廊澄懷此晏坐攝受言可忘

將進酒

文犀光射琥珀微客為主壽雲懶歸此時舉觥勝千日
巵酒使我花枝肥天桃未落春已老驅車疾走揚州道
大梁霖雨吟

濕雲壓風風無力白日茫茫光閉塞老龍怒吸江水渾
三春霖霖足三月蛟龍得志走高堤濤翻浪湧墜天低
大河南北皆澤國郊原一望沒田畦梁園改革稱貧蹙
比戶曾無三斗穀春麥秋禾委巨波并烟處處聞啼哭
哭之淚盡繼以血有司敲扑還摧裂憂國惟知督賦租
餓孍誰慮靡遺子吁嗟吁嗟真可哀驅車無計鬻嬰孩

一女千錢男五百逢人便售敢求益兒女悲號不肯行
阿母含愁佯加責兒去母孤悲不止強持兒價糴珠米
無何米盡復思兒將身潛縊綠楊裏早知兒失母難存
悔不當時一處死我聞此語心痛酸監門思得鄭公官
救民重繪當年像多恐君王不忍看君王仁聖真無極
蠲賦恒逾千萬億戒膳徹樂憂思殷蓬萊殿上無顏色
安得彼蒼施高厚電雷倏易爲星斗陰陽和燠雨無乖
永令斯民歌大有

濟寧道上

危橋浸水沒衰草與天平空橐孤雲意高秋萬里情孀

親欣返旆稚子苦遐征預卜還家後猶多旅夢驚

次書湖弟過禹門作

蒼然暮色欲何之遙拜河東大禹祠風雨會須騰赤鯉
鴻荒誰與問元夷怒平越壑無聲處志快揚帆破浪時
三歎神工非斧鑿當年行水只如斯

齊雲樓

凭欄天際盪心胸一片雲飛接岱宗縹渺層檐疑結屋
等閒高卧笑元龍自傳家學三千衆誰數仙居十二重
爲問芙蓉樓上客何如東海表齊封

凌霄花

引蔓高木巔丹竹墜烟翠相攀迷本根凌霄成底事

苦雨

堦前時復見遊魚不斷愁霖密復疎觸處墻傾兼屋漏
有人夜起護殘書

何氏

浙江山陰縣人

溪屋

四野如軍閔清流墮碧痕溪響驚來客誰至此孤村

圖繪寶鑑何氏山陰人有溪屋步流村粧霧帳四
絕僅錄溪屋一首云云味其句非能畫安得此中
受用

鍾若玉

字文貞自號元圃女士江蘇長洲縣人善書工

丹青適崑山縣生周範專

墨香居畫識鍾若玉字文貞號元圃女史崑山
周官芝溪之室工寫墨梅書法更蒼古一洗閨
閣纖弱柔媚之習

月夜

西牕遲月上風細暗香浮夜靜留花砌更殘冷翠樓離
懷憑去雁扶病又經秋暗訴長堤柳天涯縮別愁

三女岡

古塚埋荒徑徘徊未忍攀悲風起長夜明月閉幽關衰

草頻年色吳宮此境閒登臨憑眺處詩思滿秋山

牡丹

錦堆爛漫壓羣芳不愧佳名占洛陽艷色從來分地氣
綠雲行處識天香穠華九十春光媚寵愛三千漢苑妝
底用胭脂描小照東風吹綻大文章

春雨

模糊春雨暗湘川綠滿長堤草色妍點點亂飄梅似雪
絲絲倒浸柳如烟消魂粉蝶依林戢濕翅黃鶯掠幙穿
莫損苔痕蘭砌碧小紅粘處艷陽天

春日感懷

百花常擬笑春風何事飄零一夕中謝燕掠殘隄外柳
杜鵑啼落樹頭紅路迷烟塞笳聲咽雲滿山晴展響空
形影天涯憑認取半牕淡月斂朦朧

秋夜雨

雨聲浙浙篆烟消漏盡銅壺夜更遙獨坐挑燈吟楚些
隔牕滴破美人蕉

題赤壁圖

萬里烟波接遠空布帆一幅挂長風江山千古無窮恨
盡在簫聲嗚咽中

姚 洵

字琮娥江蘇吳江縣人適潘御雲著有香奩藁一卷

七十二峯足徵集姚氏名泐字琮娥松陵人以中表戚歸於潘康熙中潘子館東山遂移家焉有香奩遺稿一卷

冬日偶成

歲寒悲節序日暮益凄然隔嶺同看月凭欄獨訴天已
拚珠淚盡應使缺心憐多感梅花意含頰帶雪妍

山樓遠眺

危樓極目望天涯對景遙思感物華雲逐征帆千片亂
風吹歸雁幾行斜枝枝綠樹聞啼鳥處處青山見落花

欲寫瑤箋無處寄雙親莫是憶兒家

晚烟漠漠五湖濱靜裡愁聽雁喚頻幾處舟歸楊柳渡
一簾風送洞庭春堦前花影憐閨婦天上蟾光伴旅人
底事他鄉腸易斷每當子夜倍思親

雪後送別

閒雲風捲雪初晴乍聽流鶯第一聲正是斷腸聽不得
含頰無語送君行

綠楊初綻嫩晴天紅杏枝頭籠碧烟春色不知人去遠
空教皓月到牕前

孔素瑛

字玉田號蘭齋浙江桐鄉縣人聖裔毓楷之女也兼善丹青適嘉定金西園著有飛霞閣詩集

蘭齋題畫詩

國朝畫徵錄孔素瑛字玉田聖裔毓楷之女占籍桐鄉適烏程貢生金某善寫花鳥有機趣能詩有飛霞閣詩集蘭齋題畫詩跋共十三卷

國朝練音初集小傳孔素瑛字玉田父本聖裔桐鄉人同里金大令尚東寓膠城娶素瑛為繼室親黨以令淑稱善畫山水人物畫已即題佳句能作晉人小楷具有三絕以視古今名媛氏殆過之無不及也有蘭齋詩稿

戊午穀雨招松筠看花

詞招詩請莫嫌頻好景難逢况是春枝上絳桃餘色艷

庭前鹿韭見華新西京勝會憑誰紀班女文章久壓人
不信但來觀貴客一時翹首望龍賓

花前卽事和韻

深閨淑氣困人頻約伴同探百卉春宿雨乍收雲淡漠
韶光微映瓣鮮新容疑金屋嬌含笑香似御爐烟襲人
對景聯吟消永日竟忘誰主復誰賓

夜聞雨聲蚤起賦寄松筠

朝風暮雨妬偏頻幸得枝頭未減春金掌微濡華色嫩
薔薇露滴蕊珠新晨酣汗浹唐宮女夜浴肌香漢殿人
蚤起祇因花惜甚詩成先寄慰嘉賓

賦謝松筠見寄重訂來游仍用前韻

蕉箋聯錫不辭頻畫出人間富貴春調壓清平傳唱舊
詞雕百寶賽欄新正封佳句慚無和解語花王應笑人
有意再來教鍊字一盤酥餅待良賓

和松筠來游小園見贈原韻

丰姿清比月娟娟許向深閨締靜緣花發牕前人乍到
新詩一串似珠圓

吟情偏愛傍池亭嫋嫋垂楊恰恰鶯流水也知描好影
經時扶著曲闌行

萬氏

江西新建縣人裘大農曰修太夫人也詩見萬
年縣志

贈洪貞女

飛仙化蝶總非真譜入情緣亦可人未似洪媛清淨好
白頭猶是女兒身

吳蕙貞

字冠秋江蘇長洲縣人適陸某

咏綠萼梅

奇花向植花宮裏移傍高人薜荔墻夜月猶寒珠蘊媚
春風乍暖玉生香清標獨傲冰霜骨冷艷中含鐵石腸

莫向九疑訪仙子人間卽此是仙鄉

不寐

堦前蟋蟀擾人思月白風清憶舊時幾度欲眠眠未穩

挑燈細讀感秋詩

沈氏

浙江歸安縣人廣西平南縣知縣作霖女適鴻

臚寺少卿戴璐幼秉庭訓嫻詩禮于歸後專心

內助不復近筆硯故僅見其暮春一章

戴璐沈恭人傳略恭人姓沈氏世居竹塢婉婉性成戊寅夏于歸於予善事尊章米鹽縫紉諸務無不躬自擘畫苦持內政三十五年叨受五次誥命以疾終於京邸

戴璐哭沈恭人詩二十二首選六支離病骨怕逢秋果見驂鸞去不留三十五年成噩夢妻風苦雨不勝愁聽鼓初趨水部忙充閭佳氣悅姑瘴半生祇此開顏笑旋折南喬痛斷腸秋風羶璪集蕭齋助我留賓酒似淮博得琴堂猶躑躅更煩鬢上拔金釵偕老難期耀六珈常將簪案自矜誇而今也入安仁隊壁掛空遺感落花菜靡花斷少吟章維誦多年句有香却賴推敲成畏友吟安一字幾商量瓜果筵開歲歲供常攜兒女聚庭中今宵烏鵲仍三匝梵唄妻清徹殯宮

暮春

數聲鶗鴂過門巷靜秋千怕看荼蘼架春光又一年

自前代以來...

右...

...

...

...

...

...

...

...

...

...

...

...

...

...

...



